

Sw Maxkowh Laiz Kauqfaengz Yezsuz

Yezhanq Laemh Kauqfaengz Dwk Daenh

1 ¹ Lug zaiz dij Sen, Yezsuz Jizduz,^a kauqfaengz dix zawh hoakzaqnaeh maz: ² Daj le gaemz Yixsaiqyaq goanz puj zawxkauq dij Sen naeh mai naeh dungzlumj, Dij Sen daj Jizduz hoakzaqnaeh hax:

Mawz lez, gux nemz puj zawxkauq gux;
mwznaj hawj gaenqdix bae daekgoanq mawz,
sah mawz lauh ka loh.

³ "Mwznaj miz hiang dix yuq ndaw doanghmowz
hoakzaqnaeh rongx:

Sah Zaeuj raeuz lauh ka loh dix;
Diq sw hax ka loh mbaedmawq dix daeq naeh!"^{*b}

⁴ Doaklaeng, baenzzaeh, Yezhanq daeuj zawx
kauq dij Sen, dix yuq ndaw doanghmowz koanx

dwk daenh: "Ndaw zaw su yauq rux gaix, su hoak diauq zauh soiq naeh, hoakzaqnaeh vanz dij Sen yangq gaenq gaenqsu hoak loang naeh." Yezhanq yuq inxnaeh aeu naemx dah saeh daenh hoak diauq zauh soiq naeh. ⁵ Mbanj Yaeuhdaq gaj longq gaj miz dij goanz maz haenz Yezhanq, daengz dij goanz ndaw Yezluqsaxlaengx naengz maz haenz Yezhanq.^c Paenqdix yinq hoakri hoak loang; Yezhanq yuq ka dah Yezdanq saeh paenqdix hoak diauq zauh soiq naeh.^{d6} Yezhanq nungh sowj koan loahtoah; saikvaq zauh aeu naeng hoak.^e Gaenqjin zauh jin dij daek daj towngdoq.

⁷ Dix hax: "Goanz daeuj doaklaeng gux naeh, riangz nyeuz gux lai, haen nyeuz gux lai. Gux daengz gvih kaeuq saeh dix hih sai haiz naengz mboq paeq.

⁸ Gux aeu naemx saeh su hoak diauq zauh soiq naeh, gaj dix aeu Minghkoan dij Sen saeh su hoak diauq zauh soiq naeh."

^a**1:1** *Jizduz* zauh hax: "Goanz zoah aeu yuz maeghit zoaj ndaw to naeh." Zwzndowj, dij Sen lowg puj Yixsowhleleh goanz rawz hoak puj mbud dix, raj lowg goanz rawz hoak hongz puj Yixsowhleleh, dix nemz puj Yixsowhleleh aeu yuz maeghit zoaj ndaw to sowh goanz dix lowg naeh. Dij Sen tungzgoaq puj zawxkauq dix yinq dij goanz dix, yinq hawj paenqdix goanz Jizduz ux, hawj goanz Jizduz naeh daeuj dihndin jeuq dij goanz daj gvanx dij goanz.

^b**1:3** Inxnaeh mboq zauh hax lauh ka loh zaeh, zauh hax yaix dij goanz yinq gaenq hoakloang paenqdix, nwh kauq dij Sen.

^c**1:5** *Yezluqsaxlaengx* yuq ndaw mbanj Yaeuhdaq naeh zauh aen chaenh ux dwx nyeuz daengzle.

^d**1:5** *Hoak diauq zauh soiq naeh* zoq zauh hax aeu naemx soiq ndang. Yezhanq aeu naemx saeh sowh puj ndaw zaw gaix naeh hoak diauq zauh soiq naeh, vanz dij Sen yangq gaenq hoakloang paenqdix.

^e**1:6** Zwzpujjeq puj zawxkauq dij Sen kwnz hoakzaqnaeh nungh. Ndaw Sw Laux hongz Bwnz Daih Ngih 1:8, ndaw Sw Saxzazliqyaq 13:4.

^{*}**1:3** Maxlazjiz 3:1; Yixsaiqyaq 40:3.

Yeysuz Hawj Yezhanq Saeh Dix Hoak

Diauc Zauh Soiq Naeh; Sazdanz

Coak Yeysuz Hoakloang

⁹ Gvaq mboq ndowj lai, Yeysuz daeq ndaw mbanj Zazliqliq longq Nazsahlowh naeh maz. Yezhanq zoq yuq ka dah Yezdanq naeh saeh dix hoak diauc zauh soiq naeh. ¹⁰ Yeysuz cenq daeq ndaw naemx meq maz, zoq leztaen fax aj. Minghkoan dij Sen daj noagbiadhaeb dungzlumj loangzdaeuj ndang dix. ¹¹ Yaq miz hiang kauq daeq ndaw fax loangzdaeuj hax: "Mawz zawh lug zaiz gux, gux ngaiq mawz, zaemz mawz taeuq."

¹² Minghkoan dij Sen cenq nemz Yeysuz bae ndaw doanghmowz. ¹³ Yeysuz yuq ndaw doanghmowz siqsip vaenz. Siqsip vaenz naeh Sazdanz daz coak Yeysuz hoak loang.^f Yeysuz daj do'bo zaemh yuq. Miz bin dij Sen kvej hawj dix.

Yeysuz Rongx Siq Goanz

Pujdwkbya Hoak Cohsaenz Dix

¹⁴ Yezhanq zoah daenh goangz mwz kaeng ndaw lauz yaq, Yeysuz dauh bae mbanj Zazliqliq aeu kauqfaengz dij Sen koanx hawj daenh biak. ¹⁵ Dix hax: "Taeng zwz yaj, Goh dij Sen zawj su yah!^g Gaenqsu hoak loang yauq rux gaix, sinq kauqfaengz dij Sen."

¹⁶ Yeysuz daeq henz kow Zazliqliq, dix leztaen song goanz puj dwkbya yuq ndaw kow dwkbya. Song goanz naeh zawh Cizmaenh daj nongx dix Anzdowhle. ¹⁷ Yeysuz daj paenqdix hax: "Maz nowngz gux hoak cohsaenz gux. Koax daekgoanz su dwk ndaej dij bya, gaj gannaeh gux hawj su ndaej dij goanz." ¹⁸ Paenqdix cenq jizzaz mowngx paenqdix, maz nowngz dix hoak cohsaenz dix.

¹⁹ Paenqdix yuq henz kow goq daeq daeq, daeq bae hongj ixux, Yeysuz leztaen doiq lug zaiz Cizpihtaiq, Yaqgowh daj nongx dix Yezhanq. Paenqdix yuq ndaw lowz pung mowngx. ²⁰ Yeysuz cenq rongx paenqdix, paenqdix zoq jizzaz dez paenqdix daj lugriangz dez paenqdix haeg yuq ndaw lowz, doiqdix bae nowngz Yeysuz.

Goanz Zoah Dij Pi Mwz Nandang Naeh

²¹ Paenqdix maz taeng longq Zazbowhnungh. Taeng Vaenz Cednoi,^h Yeysuz mwz rownzndawcowq zau daenh.ⁱ ²² Yeysuz zau daenh mboq daj sowh lauxswz zau *Sw Dij Sen* naeh dungzlumj, unj dix zau daenh, miz qenhliq taeuq. Baenznaeh gawz ruxnyinz Yeysuz zau gawz goj sawz taeuq.

²³ Miz goanz ux zoah dij pi mwz ndang dix, gaunaeh dix maz rownzndawcowq. Dix rongx: ²⁴ "Yeysuz, ndaw Nazsahlowh, mawz baenzzaqrawz

^f1:13 *Sazdanz* zawh minxzwh do gvanx dij pi naeh.

^g1:15 *Goh Dij Sen* zoq zawh hax dij Sen haeggaj daeuj gvanx dij goanz dix, gvanx daengzle sowh gaenq dix chauq naeh.

^h1:21 *Vaenz Cednoi*q zawh gongghw sowh vaenz daih jiet naeh. Sowh vaenz naeh puj Yaeuhtaiq zauh cednoi, mboq hoak gaeng, biangz dij Sen. Ndaw *Sw Zwz nduq* 2:2-3.

ⁱ1:21 *Rownzndawcowq* zawh sowh dih ux dij goanz puj Yaeuhtaiq yuq ndaw dix biangz dij Sen, doag *Sw Dij Sen*. Puj Yaeuhtaiq gaj longq gaj miz rownzndawcowq.

daet piu? Mawz daz ndaep piu max? Gux ruxndeq mawz zawh gawz, mawz zawh goanz dij Sen lowg daeuj, zawh goanz sawrik naeh!"

²⁵ Yezsuz hwt dij pi: "Mbaet baeg! Daeq ndaw ndang goanz naeh og daeuj."

²⁶ Dij pi hawj goanz gaengnaeh saenq rowdrowd, daeh rongx gaemz ux, yaq ni goanz gaengnaeh bae. ²⁷ Daengzle sawz taeuq, goanz lej cham goanz: "Gaenqnaeh zawh gaeng saeh mux? Sowh saeh naeh mboq sanz ruxnyinz. Dix miz qenhliq nemz dij pi ngah, daengz dij pi naengz biak dix ngah!"

²⁸ Yaq yuq ndaw mbanj Zazliqliq naeh, gaj goanz gaj ruxndeq gaenq Yezsuz hoak naeh.

Yezsuz Ya Ndae Pujchaej Goanz Lai Taeuq

²⁹ Paenqdix ni dih aen rownzndawcowq naeh, cenq bae rownz Cizmaenh daj Anzdowhle; Yaqgowh daj Yezhanq goj zaemh bae. ³⁰ Yah daiq Cizmaenh nowxndaed,^j noanz ndaw tanj. Yezsuz daeh mwz taeng, paenqdix zoq haxdoq Yezsuz gaenqdix baenz gaeng chaej. ³¹ Yezsuz bae lez dix, laeg mungz dix, fowz dix dwnq maz. Gaenqdix mbaeddoag ndae, zoq dwnq maz kvej hawj paenqdix.

³² Sowh gau tang'vaenz doak naeh, miz goanz zowz puj baenzchaej daj sowh puj zoah dij pi mwz ndang naeh maz haenz Yezsuz. ³³ Daengz longq dij goanz maz baegdu rownz Cizmaenh. ³⁴ Yezsuz ya jij rawz yowngh puj chaej, goj daem dij pi ni lai taeuq. Dij pi ruxndeq dix zawh lug zaiz dij Sen, dix zoq mboq hawj dij pi hax kauq.

Yuq Mbanj Zazliqliq Laemh Kauqfaengz dij Sen Dwk Daenh

³⁵ Nawlaeng zaeux, fax naengz mboq rungh, Yezsuz zoq dwnq maz, ni aen rownz naeh, bae dih ux mboq miz gawz, yuq dih naeh daj dij Sen hax kauq. ³⁶ Cizmaenh daj dungzbowndix dix og bae cha dix, ³⁷ cha mex yaq, paenqdix zoq hax: "Gaj goanz gaj cha mawz ah!"

³⁸ Yezsuz hax: "Gaenqraez bae longq ndai mbeh, bae le longq haenzhenz inxnaeh, gux baenz yuq le dih naeh aeu kauq faengz dij Sen koanx dwk daenh, unj, gux daeuj dihndin zawh cho gaenqnaeh."

³⁹ Yaq, Yezsuz daeq daengz mbanj Zazliqliq nauq, bae taeng longq rawz, zoq yuq rownzndawcowq aeu kauqfaengz dij Sen haxdoq daenh, yaq daem sowh dij pi mwz ndang dij goanz naeh og daeuj.

Yezsuz Ya Goanz Baenz Nux Ux Ndae

⁴⁰ Miz goanz baenz nux ux maz doqnaj Yezsuz, gvih mwz doq Yezsuz, vanz Yezsuz, hax: "Jixzawh mawz venq, mawz rux hawj koj ndae, rux hawj koj sawrik mboqyaq." ⁴¹ Yezsuz zawchaej dix, ed mungz bae baed dix, hax: "Gux venq, mawz sawrik ndeh!" ⁴² Nux ndaw ndang goanz naeh mbaeddoag ni dix, dix zoq ndae, zoq sawrik. ⁴³ Yezsuz cenq soangq dix bae, saengq dix: ⁴⁴ "Mawz hoakrawz goj laek haxdoq gawz, mawz cenq mwz hawj puj mbud dij Sen saeh mawz lez, yaq hoakzaq sowh gaenq

^j1:30 Inxnaeh hax daiq Cizmaenh, zawh hax daiq oanq dix, zoq zawh meh mijmez dix.

Moahciz hax naeh aeu doihdo mwz mbud dij Sen, hawj daenh ruxndeq nux mawz haeuz ndae yaq."^k

⁴⁵ Gaj goanz naeh daeh og bae, bae dih lej haxdoq dih. Hoakzaqnaeh hawj Yezsuz mwz longq rawz goj mboq zaih, miz dij goanz cha dix raengh gvaq. Doaklaeng Yezsuz zux bae sowh dih mboq miz gawz naeh ndowj. Gaj daenh goj naengz daeq dihrawz raeuh maz cha dix.

Yezsuz Ya Goanz Baenzchaej

Mboq Rux Chaeg Ux Ndae

2¹ Gvaq ndaej jij vaenz ux, Yezsuz daeuq dauh maz taeng Zazbowhnungh. Daenh ruxndeq dix yuq rownz. ² Dij goanz maz lai yaengh lai, daengz ndaw rownz daem gaj dij goanz. Daengz baegdu naengz mboq miz dih rawz byaeuq. Gau Yezsuz aeu kauq dij Sen zau sowh goanz yuq ndaw rownz naeh, ³ miz siq goanz tam goanz din mungz mboq rux chaeg ux maz taen Yezsuz. ⁴ Gaj miz dij goanz lai gvaq, paenqdix mwz haenz Yezsuz mboq baenz. Yaq paenqdix yuq niangz aen rownz Yezsuz yuq naeh aj ruz ux, yaq aeu goanz puj chaej naeh aeu daengz faz dix noanz naeh hoj sanq hoj kven zoangq

bae doqnaj Yezsuz. ⁵ Yezsuz leztaen le goanz naeh sinq dix taeuq, zoq daj goanz puj chaej din mungz mboq rux chaeg naeh hax: "Lug aj, gux yangq gaenq hoakloang mawz eh."

⁶ Gau gaengnaeh miz jij goanz sowh lauxswz zau *Sw Dij Sen* naeh goj yuq dih naeh naengh. Ndaw zaw paenqdix nwh: ⁷ "Dix baenzaqrawz hax sowh kauq naeh? Goanz naeh ganz hax sowh kauq naeh ngah? Mizgaj dij Sen, gvaqmaz mboq miz gawz rux yangq dij goanz puj hoak loang baenz! Baenzaqnaeh gaenqdix hoakzaqnaeh hax, dix aeu hoakri hoak dwx daj dij Sen baenzndeu, dix zawh hoak loang dij Sen!"

⁸ Sowh lauxswz zau *Sw Dij Sen* naeh ndaw zaw paenqdix hoakzaqnaeh nwh, Yezsuz cenq ruxndeq ndaw zaw paenqdix nwh gaeng, zoq daj paenqdix hax: "Gaenqsu baenzaqrawz hoakzaqnaeh nwh?" ⁹ Daj goanz din mungz mboq rux chaeg naeh hax: Yangq gaenq hoakloang mawz eh! Raj daj dix hax: Dwnq maz, gaem faz mawz bae ndeh, Song yowngh naeh yowngh rawz hoak ngaih nyeuz mux?^l ¹⁰ Gaj mbaenqnaeh gux ya goanz naeh hawj su lez, hawj su ruxndeq gux Lug Dij Goanz^m yuq dihndin miz qenhliq yangq gaenq hoakloang dij goanz naeh."

^{k1:44} Moahciz zawh zwzpujjeq goanz puj zawxkauq dij Sen ux. Dij Sen hawj dix mai fahliah dij Sen, aeu sowh fahliah naeh zau puj Yaeuhtaiq. Dix mai ndaw haj bwnz sw, miz bwnz ux minxzwh rongx hoak Sw Liqvaeq. Ndaw Sw Liqvaeq 14:1-32, jixzawh miz dij goanz gawz baenznux yaq ya ndae, dij Sen yaix puj mbud dij Sen hoj hoakrawz hoak hawj daenh ruxndeq sowh goanz baenz nux naeh haeuz ndae yaq.

^{l2:9} Nganq puj Yaeuhtaiq maz hax, song yowngh naeh mizgaj dij Sen zux rux hoak baenz.

^{m2:10} Yezsuz kwnzkwnz aeu aen minxzwh Lug Dij Goanz naeh nyaek hoakri. Aen minxzwh **Lug Dij Goanz** naeh yuq Sw Danqyixlix 7:13-14. Pujzawxkauq dij Sen, Danqyixlix, hax: *Zang'haemh gux daj paen'hwnz dungzlumj leztaen miz goanz ux daj lug dij goanz dungzlumj. Dix kviq pajfax maz dih dij Sen bwnzmiz miz daengznauq naeh. Daenh zoq lingz dix mwz doqnaj dij Sen naeh. Gaenqdix ndaej dawjfax sowh rux gvanx daengzle naeh, gaj goanz gaj biangz dix, gaj goanz gaj biak dix. Hoakzaqnaeh, goh rawz gojvenj, changz rawz gojvenj, dij goanz hax sowh kauq rawz gojndae daengzle biangz dix, nwngz dix. Lug dij Goanz gvanx daenh daengznauq, mboq miz gawz hawj goh dix lown.*

Hax gaemz naeh nauq yaq, dix daj goanz puj chaej din mungz mboq rux chaeg naeh hax: ¹¹ "Gux nemz mawz dwnq maz, gaem faz mawz, mwz rownz ndeh." ¹² Goanz gaengnaeh dwnq maz, gaem faz dix, yuq doqnej daengzle og bae. Daengzle sawz daengz mboq zawh hax nyaeux, biangz dij Sen hax: "Gaenqpiu mboq sanz taen sowh saeh naeh."

Yeysuz Rongx Liqvaeq Maz Nowngz Dix

¹³ Yeysuz daeuq mwz haenz kow Zazliqliq. Miz yaengh boangx goanz maz haenz dix, dix zoq zau paenqdix. ¹⁴ Gau dix daeuq daeq mwz baihnaj naeh, leztaen goanz puj caeu coiq ux naengh yuq dih caeu coiq naeh. Goanz naeh zawh Liqvaeq goanz lug zaiz Yaqlowhfaez naeh. Yeysuz daj dix hax: "Maz nowngz gux, hoak cohsaenz gux." Liqvaeq zoq dwnq maz nowngz dix.

¹⁵ Doaklaeng Yeysuz bae rownz Liqvaeq jinkauej, miz puj caeu coiq, miz puj hoak loang goanz lai taeuq zaemh jin, paenqdix goj haeuz nowngz Yeysuz. Paenqdix daj Yeysuz daj cohsaenz Yeysuz zaemh jinkauej. ¹⁶ Baih Fahliqsaiq sowh lauxswz zau *Sw Dij Sen* naeh leztaen Yeysuz daj sowh puj hoak loang naeh daj sowh puj caeu coiq naeh zaemh yuq dih ndeu jinkauej, zoq cham cohsaenz Yeysuz: "Yeysuz baenzrawz daj puj caeu coiq, daj puj hoak loang zaemh yuq dih ndeu jinkauej mux?"ⁿ

¹⁷ Yeysuz ruxnyinz zoq hax: "Puj mboq baenzchaej yungq mboq zoah puj ya chaej. Mizgaj puj chaej zux yungq zoah puj ya chaej. Gux daeuq inxnaeh mboq

zawh cha sowh puj gaemz hax mboq miz naeh, gux zawh daeuq cha puj hoak loang."

Gaenq Mawq Mboq Hawj Daj

Gaenq Gaeuq Dungzchonj

¹⁸ Zwz naeh, Yezhanq goanz saeh daenh hoak diauq zauh soiq naeh, cohsaenz dix, daj dij goanz baih Fahliqsaiq jenj kaeuj hoakri.^o Miz dij goanz maz cham Yeysuz: "Cohsaenz Yezhanq daj cohsaenz baih Fahliqsaiq naeh jenjkaeuj hoakri, baenzrawz cohsaenz mawz ej jin naeujmawj?"

¹⁹ Yeysuz yaeng: "Jixzawh goanz raep mez vaenz naeh hoak qiag, puj qiag vaenz naeh hoakrawz jenjkaeuj hoakri mux? Nanghgaj goanz raep mez naeh naengz daj paenqdix zaemh yuq, paenqdix zoq jin. ²⁰ Gaj gvaq sowh vaenz naeh yaq, goanz raep mez naeh zoah daenh gaep mwz, taeng zwz naeh paenqdix zoq jenjkaeuj hoakri.

²¹ "Mboq miz gawz aeu paeng mawq pung sowj gaeuq. Jixzawh hoakzaqnaeh hoak dih pung mawq naeh rux hawj sowj gaeuq riag, hawj dih rawz riag gajfa riag ruz dwx.

²² "Goj mboq miz gawz aeu laeuj mawq nyaengx ndaw daeh naeng gaeuq. Jixzawh aeu laeuj mawq nyaengx ndaw daeh naeng gaeuq, laeuj mawq rux gawh, gawh gau rawz rux hawj daeh naeng gaeuq tiag. Hoakzaqnaeh laeuj daj daeh gaeng goj mboq ndaej. Baenzzaqnaeh, laeuj mawq aeu laep daeh naeng mawq zuxbaenz."

ⁿ2:16 *Baih Fahliqsaiq* zawh dij goanz puj Yaeuhtaiq. Paenqdix hax paenqdix biak fahlih Moahciz, gaj paenqdix goj zau daenh sowh zwzpujjeq zauh naeh.

^o2:18 Paenqdix jenj kaeuj hoakri zawh zawx zawdoag vanz dij Sen.

Yeysuz Zawh Zaeuj Vaenz Cednoiq

²³ Miz Vaenz Cednoiq ux, Yeysuz gvaq haenz naz kaeujmeg. Cohsaenz dix daj dix zaemh bae; paenqdix menq daeq menq aeu mungz daet i rongz kaeujmeg ux jin. ²⁴ Yaq dij goanz Fahliqsaiq daj Yeysuz hax: "Mawz lez, cohsaenz mawz baenzaqrawz hoak sowh gaenq Vaenz Cednoiq mboq hawj hoak naeh mux?"

^{25–26} Yeysuz yaeng: "Zwz Daqvaeq dongxyaeg naeh dix hoak gaeng, su mboq sanz ndaej doag max?^p Zoq zawh zwz Yaqbixyaqtaz hoak puj mbud dij Sen goanz saeq dwx nyeuz daengzle naeh, Daqvaeq daj puj nowngz dix dongxyaeg, dix zoq ndonj mwz zangipungh dij Sen, paenqdix jin gaenq binx baiz doqnaj dij Sen naeh. Fahlih gaenqraeuz hax: Mizgaj puj mbud dij Sen zux hawj jin sowh binx naeh, gaj Daqvaeq hoakri dix jin yaq, daeuq aeu baen hawj puj nowngz dix naeh jin ndoij."*

²⁷ Yaq Yeysuz hax: "Dij Sen mboq zawh cholaeng Vaenz Cednoiq chauq dij goanz, dix zawh cholaeng dij goanz chauq Vaenz Cednoiq. ²⁸ Baenzaqnaeh Gux Lug Dij Goanz goj zawh zaeuj Vaenz Cednoiq."

Yeysuz Ya Goanz Qen Mboq Rux Chaeg Ux Ndae

3 ¹ Yeysuz daeuq mwz rownzndawcowq. Dih naeh miz goanz ux miz qen ux nyaeb, chaeg

mboq baenz, liaksaemjse. ² Mbangj goanz zawx cha saek diauq gauq Yeysuz, zoq caqsiq lez dix, lez dix rux mboq rux yuq sowh Vaenz Cednoiq naeh ya goanz naeh.^q ³ Yeysuz daj goanz naeh hax: "Dwnq maz, in yuq doqnaj daengzle." ⁴ Yaq dix cham daengzle: "Vaenz Cednoiq hawj hoak saeh ndae rux hawj hoak saeh raix mux? Hawj jeuq dij goanz rux hawj kaj dij goanz mux?" Daengzle gawz gaemz rawz goj mboq goak.

⁵ Yeysuz menq zaengz menq lez bae haenzhenz, leztaen paenqdix naengz mboq byenq saek'i, dix zawgoangj, yuqraix. Yaq dix daj goanz baenzchaej naeh hax: "Ed mungz mawz maz!" Goanz gaengnaeh ed mungz, mungz dix zoq byenq ndae, baenzaqgaeuq.

⁶ Sowh dij goanz Fahliqsaiq naeh daeh daeq rownzndawcowq og daeuj zoq daj dij goanz Baih Laux hongz Cizlih koanx hoakrawz kaj Yeysuz.^r

Miz Dij Goanz Lai Taeuq

Bae Haenz Kow Cha Yeysuz

^{7–8} Yeysuz daj boangx cohsaenz dix ni dih naeh, dauh bae haenz kow Zazliqliq. Daenh ruxnyinz suq saeh Yeysuz hoak naeh. Miz yaengh boangx dij goanz daeq Zazliqliq maz nowngz dix. Goj naengz miz dij goanz lai taeuq daeq mbanj Yaeuhdaq, daeq Yezluqsaxlaengx, daeq mbanj Yixtuxmaix,

^p2:25-26 Daqvaeq zawh zwzpujjeq laux hongz Yixsowhleuh ux. Lez Sw Saxmuxex Bwnz Daih Aet 21:1-6.

^q3:2 Jixzawh Yeysuz ya goanz naeh, paenqdix zoq hwet dix, hax dix hoak sowh Vaenz Cednoiq mboq hawj hoak naeh.

^r3:6 *Baih Laux hongz Cizlih* naeh zawh baih puj saeq, paenqdix zawh dij goanz puj Yaeuhaiq. Gaj paenqdix biak Laux hongz Cizlih. Laux hongz Cizlih yuq mbanj Yaeuhaiq hoak hongz, *Baih Laux hongz Cizlih* saeh lauxhongx Lozmax hoak saeh.

*2:25-26 Saxmuxex Aet 21:1-6.

daeq mbanj dih doiqfaeg ka dah Yezdanq, daeq diak haenzhenz Taiq'ex chaenh daj Cizdunq chaenh maz dih dix naeh.^{s 9–10} Dix ya ndae puj chaej lai taeuq, nanghgaj zawh puj chaej daengzle raex maz doq dix, daz lumh dix. Dij goanz lai gvaq, Yezsuz nemz cohsaenz dix saeh dix cha aen lowz ixux, hoakzaqnaeh daenh zux mboq rux neb zoah dix. ¹¹ Sowh dij pi mwz ndang dij goanz naeh nanghgaj leztaen Yezsuz, zoq gvih bae doqnaj dix, rongx: "Mawz zawh lug zaiz dij Sen!" ¹² Gaj Yezsuz hwt paenqdix, mboq hawj paenqdix hax gaenqdix zawh gawz.

Yezsuz Lowg Sipngih Goanz Dij Goanz Zawxkauq

¹³ Yezsuz kwnj mwz ndaw bo, dix zawx hawj gawz maz raeuh dix zoq rongx maz nauq, paenqdix maz yaq, ¹⁴ dix hawj sipngih goanz hoak dij goanz zawxkauq dix, daeuq daj paenqdix hax: "Gux lowg gaenqsu, zawh hawj su kwnz daj gux zaemh yuq, goj nemz su bae zawx kauq gux; ¹⁵ goj hawj su miz sowh qenhliq rux daem dij pi naeh." ¹⁶ Sipngih goanz Yezsuz lowg naeh zawh: Cizmaenh, goanz Yezsuz daeuq nyaek hoak Bihdowh naeh, ¹⁷ doiq lug zaiz Cizpihtaiq, Yaqgowh daj nongx dix Yezhanq, Yezsuz daeuq saeh doiq bihnongx naeh nyaek minxzwh hoak Banqnihqih; "Banqnihqih" zoq zawh hax "lug faxumj," ¹⁸ Anzdowhleh,

Faezliq, Bazdozloahmaix, Maxtaiq, Dozmax, Yaqgowh goanz lug zaiz Yaqlowhfaez naeh, Dahtaiq, Cizmaenh goanz yuq ndaw dangxpaiq Faenqroi q naeh,^{t 19} daj Yaeuhdaq goanz puj Zazyoah goanz daeklaeng aeu Yezsuz kai hawj sowh puj daj Yezsuz hoak dangqbaih naeh.

Dij Sen Mboq Rux Yangq dij Goanz Laiq Minghkoan Dij Sen Zawh Mboq Ndae

²⁰ Yezsuz ndonj mwz aen rownz ux, miz yaengh boangx dij goanz maz, hawj dix daj cohsaenz dix daengz gau jin kaeuj naengz mboq miz. ²¹ Rownz Yezsuz ruxnyinz yaq, hax Yezsuz baenzbaeg, paenqdix zoq og bae dih aen rownz Yezsuz yuq naeh daz daet dix. ²² Sowh lauxswz daeq Yezluqsaxlaengx maz, sowh lauxswz zau *Sw Dij Sen* naeh, paenqdix hax: "Dix zoah Behcizbuq do gvanx dij pi naeh mwz ndang yah!"^u Dix zawh maengx do gvanx dij pi naeh saeh dix daem dij pi naeuj!" ²³ Yezsuz rongx boangx goanz naeh maz doqnaj dix, aeu bixliq zau paenqdix, dix hax: "Sazdanz hoakrawz haeggaj daem Sazdanz mux? ²⁴ Aen goh ux jixzawh ndaw dix haeggaj dungzjeng, aen goh naeh gaemx mboq ndaej ndowj gajrawz. ²⁵ Rownzgoanz ux jixzawh ndaw rownz gaj vaenz gaj haeggaj dungzjeng, rownz naeh zoq dungzbyaeg mboqyaq. ²⁶ Sazdanz jixzawh haeggaj daj hoakri mboq dungzhoj, haeggaj dungzbyaeg,

^s3:7-8 Boangx goanz naeh puj daeq baih rawz maz goj miz. Mboq zawh mizgaj dij goanz puj Yaeuhtaiq; sowh dij goanz puj gaeng goj miz.

^t3:18 *Dangxpaiq Faenqroi q* daj Baih Laux hongz Cizlih zawh dangqbaih. Dangxpaiq naeh mboq venq biak fahliah Loahmax.

^u3:22 *Behcizbuq* zawh aen minxzwh do dij sen zaj zwzpujjeq ux. Rongx Sazdanz rongx hoak Behcizbuq. Daenh aeu aen minxzwh naeh hax dix zawh do gvanx dij pi naeh.

dix zoq naengh mboq vwnx, zoq taeng vaenzmowd
dix yaj. ²⁷Gux daem dij pi daj goanz ux longx
za'hoq puj zaengx dungzlumj. Mboq miz gawz yumq
mwz longx za'hoq goanz puj zaengx daengzhwx,
dix zawx mwz longx za'hoq goanz puj zaengx naeh
gaurawz, dix hoak rawz goj puk goanz puj zaengx
naeh daekgoanq. Hoakzaqnaeh gaenqdix zux longx
za'hoq puj zaengx ndaej.

²⁸"Gux haxdoq su swhlit, dij goanz hoak loang
gaeng, laiq gawz zawh mboq ndae gojvenj, dij Sen
goj rux yangq dix. ²⁹Gaj gawz laiq Minghkoan dij
Sen zawh mboq ndae, dij Sen zoq mboq rux yangq
dix, dix zoq haeggaj tw daengznauq."

³⁰Dix hoakzaqnaeh hax zawh gau gaengnaeh miz
dij goanz laiq dix zoah dij pi mwz ndang.^v

Gawz Biak Kauq Dij Sen Gawz Zoq Zawh Dij Goanz Rownz Yezsuz

³¹Gaunaeh, meh Yezsuz daj le nongx zaiz dix maz
taeng, paenqdix yuq baihnog in, nemz daenh maz
ndaw rownz rongx Yezsuz. ³²Boangx goanz naengh
haenz Yezsuz naeh haxdoq Yezsuz: "Meh mawz daj
le nongx zaiz mawz maz baihnog cha mawz yaj."

³³Dix daj paenqdix hax: "Meh gux, bihnongx zaiz
gux wznaex?" ³⁴Yaq dix daeuq lez sowh puj naengh
haenzhenz dix naeh, hax: "Su lez, boangx naeh
zoq zawh meh gux, bihnongx zaiz gux, ³⁵nanghgaj
gawz biak kauq dij Sen bae hoak, gawz zoq zawh
bihnongx zaiz gux, bihnongx nyingz gux, meh gux."

Aen Bixliq Sauq Kaeujmeg Naeh

4 ¹Yezsuz daeuq bae haenz kow zau daenh. Miz
dij goanz maz dih dix naeh lai gvaq, dix zoq
kwnj mwz ndaw lowz, naengh yuq now lowz zau
daenh, hawj daenh yuq dihliangx biak. ²Dix aeu
jiggaj yowngh bixliq zau paenqdix, zau paenqdix lai
taeuq. Dix hax:

³"Gaenqsu biak ndae'ndowq! Miz goanz puj hoak
gaengx ux bae sauq kaeujmeg. Gau dix sauq naeh,
⁴mbangj maet kaeujfaenz doak bae ka loh, zoq zoah
dij noag jin. ⁵Mbangj maet kaeujfaenz doak bae
dih namh nduk, namh mbang gvaq, faenz kaeuj
kwnj maz kvaiq. ⁶Gaj go kaeuj ex mboq miz laeg,
tang'vaenz ping gaurawz, zoq choj nauq. ⁷Mbangj
maet kaeujfaenz doak bae jeh nyaj,^w nyaj daeh roak,
zoq yaz zoah go kaeuj nauq, go kaeuj zoq maj baenz
jin mboq ndaej. ⁸Mbangj maet kaeujfaenz doak bae
dih namh yawz, dix zoq ngaed, maj maz baenz go
dwx, taeng zwz caeu maz zoq ndaej lai yaengh lai.
Lai nyeuz faenz dix samsip daep, choaksip daep,
mbangjzwz naengz ndaej nyeuz baeg daep."

⁹Yaq dix daeuq hax: "Miz mbawchu rux biak, zoq
caqsiq biak!"

Baenzaqrawz Aeu Bixliq Zau Daenh

¹⁰Gau Yezsuz haeggaj yuq naeh, sipngih goanz
dij goanz zawxkauq Yezsuz daj sowh dij goanz daj
Yezsuz zaemh yuq naeh cham Yezsuz, cham dix le
aen bixliq dix hax naeh zawh hax gaeng. ¹¹Yezsuz

^v3:30 Yezsuz zawh aeu Minghkoan dij Sen daem dij pi, gaj boangx goanz naeh hax dix zawh vanz laux hongz dij pi saeh dix daem dij pi. Hoakzaqnaeh zoq zawh lez mboq sanj Minghkoan dij Sen, laiq Minghkoan dij Sen zawh mboq ndae.

^w4:7 Inxnaeh mbaednduq zawh hax: *Mbangj maet doak bae jeh nam, nam daeh roak maz, zoq yaz nauq.*

hax: "Sowh saeh Goh dij Sen naeh koax daekgoanq dij Sen mboq hawj gawz ruxndeq, gannaeh dij Sen hawj su ruxndeq.^x Gaj daj puj baihnog, gux zau gaeng gux goj aeu bixliq zau. ¹² Hoakzaqnaeh, hawj paenqdix

"Lez lej lez, gaj lez mboq taen;

Biak lej biak, gaj mboq ruxndeq hax gaeng.

Yaj paenqdix dauh maz doq dij Sen.

Gaeng paenqdix hoak loang naeh ndaej yangq."^y

Aen Bixliq Sauq Kaeujfaenz Naeh Zawh Hax Gaeng

¹³ Yezsuz daeuq cham paenqdix: "Gaenqsu mboq ruxndeq aen bixliq naeh hax gaeng maj? Haenx, gaenqsu hoakrawz ruxndeq aen bixliq ndai hax gaeng mux?

¹⁴ "Goanz sauq kaeujfaenz gaengnaeh zawh daj sowh puj aeu kauq dij Sen haxdoq daenh naeh dungzlumj.

¹⁵ "Miz dij goanz hiamq biak kauq dij Sen, Sazdanz zoq cenq maz, longx kauq dij Sen. Sowh naeh zoq daj kaeujfaenz doak bae ka loh dungzlumj.

¹⁶⁻¹⁷ "Miz dij goanz daeh ruxnyinz kauq dij Sen, ndaw zaw faengz, zoq cenq biak. Gaj kauq dij Sen yuq ndaw zaw paenqdix daj kaeujngaed mboq miz laeg dungzlumj, mboq vwnx, mboq ndowj. Gaurawz yuqraix rux gau cho biak kauq dij Sen daenh haiq

paenqdix, paenqdix zoq biak kauq dij Sen gah. Sowh naeh zoq daj kaeujfaenz doak bae dih namhnduk dungzlumj.

¹⁸⁻¹⁹ "Miz dij goanz ndaej biak kauq dij Sen yaq, gaj pyej gaeng dihndin lai yowngh gvaq, nwh gaj ngaenzjenz, zoah ngaenzjenz yaz ta, zawx hoak yowngh hoak yowngh, zoq mboq aeu kauq dij Sen nyaengx zaw. Sowh naeh zoq daj sowh kaeujfaenz doak bae jeh nyaj naeh dungzlumj zoah nyaj tumj nauq, baenz jin mboq ndaej.^z

²⁰ "Gaj miz dij goanz daeh biak kauq dij Sen zoq bae nwh, bae hoak. Sowh naeh zoq daj kaeujfaenz doak bae dih namh yawz dungzlumj; baenz jin ndaej, ndaej lai nyeuz samsip daep, choaksip daep, baeg daep."

Dij Goanz Hoakrawz Biak Dij Sen, Zoq Hoakrawz Ruxndeq

²¹ Yezsuz daeuq hax: "Miz gawz diamj daeng aeu choiq gumq? Rux aeu nyaengx dawj tanj ej mboq aeu nyaengx now zongz ah? ²² Gaeng saeh gojvenj, daengz aeu gowx ndae gajrawz goj rux miz dij goanz ruxndeq. Gaeng saeh gojvenj, daengz yaz ndae gajrawz, goj rux miz dij goanz leztaen. ²³ Miz mbawchu rux biak zoq caqsiq biak!"

²⁴ Dix haxdoq paenqdix: "Yauq caqsiq nwh kauq dij Sen zawh hax gaeng! Gaenqsu nwh gajrawz, dij Sen zoq hawj gaenqsu ruxndeq gajrawz, yaq

^x4:11 Goh dij Sen zawh hax dij Sen haeggaj daeuj gvanx dij goanz dix chauq naeh.

^y4:12 Le gaemz naeh haeuq yuq Sw Yixsaiqyaq 6:9-10.

^z4:18-19 Inxnaeh mbaednduq zawh hax: *Sowh naeh zoq daj sowh kaeujfaenz doak bae jeh nam naeh dungzlumj zoah nam tumj nauq, baenz jin mboq ndaej.*

naengz hawj gaenqsu ruxndeq lai tem.^a ²⁵ Unj gawz ruxndeq gaenq dij Sen, dij Sen zoq hawj dix ruxndeq tem, gaj gawz mboq ruxndeq gaenq dij Sen, daengz gaenqdix ruxndeq naeh dij Sen naengz hawj dix mboq ruxndeq."

Aen Bixliq Kaeujfaenz Haeggaj Ngaed Naeh

²⁶ Yezsuz hax: "Goh dij Sen zoq daj goanz aeu kaeujfaenz sauq bae dihndin naeh dungzlumj. ²⁷ Fax ndaem goanz naeh zoq noanz, fax rungh dix zoq dwnq, kaeujfaenz zoq haeggaj ngaed, haeggaj maj. Gaj hoakrawz ngaed, hoakrawz maj, dix goj mboq ruxndeq. ²⁸ Namh haeggaj hawj kaeujpyaek sowd, baenz go yaq, zux og rongz, doaklaeng rongz dix zux gaj laeng gaj maeg, ²⁹ yaq baenzjin, taeng zwz caeu, dix zoq cenq aeu hinh bae hoan."

Aen Bixliq Faenz Jeqchaliq Naeh

³⁰ Yezsuz hax: "Gaenqraeuz aeu gaeng maz bij Goh dij Sen nix? Aeu gaeng maz bixliq hax nix? ³¹ Goh dij Sen daj faenz jeqchaliq dungzlumj.^b Faenz dix ix nyeuz faenz pyaek yowngh ndai lai. ³² Gaj aeu dix bae ndaem yaq, gaj laeng gaj maj. Maj baenz go dwx, go dix dwx nyeuz go pyaek yowngh ndai lai. Ngah dix dwx, dij noag daeuj dawj dix hoak mungx."

³³ Yezsuz aeu sowh bixliq naeh lai yowngh taeuq zau daenh. Daenh rux biak gajrawz, dix zoq zau daenh gajrawz. ³⁴ Dix zau daenh gaeng, dix mizgaj aeu bixliq zau daenh. Gvaq yaq, sowh gau mboq miz

gawz naeh, dix zoq haxdoq cohsaenz dix gaenqdix hax naeh zawh hax gaeng.

Yezsuz Hawj Naemx Dingh

³⁵ Haemh gaengnaeh, Yezsuz daj cohsaenz dix hax: "Gaenqraeuz uaij lowz bae doiqfaeg eh." ³⁶ Yaq cohsaenz Yezsuz zoq ni boangx goanzlai dihnaeh, kwnj mwz aen lowz Yezsuz yuq naeh, daj Yezsuz zaemh bae. Goj miz aen lowz puj ndai zaemh bae. ³⁷ Ndaw kow mbaeddoag miz laemz dwx, naemxfowd maz ndaw lowz. Daengz aen lowz zaekgaj zaem nauq. ³⁸ Zwz naeh, Yezsuz yuq tang lowz e mwz to'moan noanzlaep. Cohsaenz dix zoq byoak dix, daj dix hax: "Lauxswz, mawz daz jizzaz naemx tumj piu tai naeux?" ³⁹ Yezsuz dwnq maz, hwt laemz dwx, hwt naemxfowd, hax: "Byaek! Mbaet naeuz kvaiq ux!" Laemz zoq mbaeddoag mbaet, ndaw kow goj mbaeddoag dingh. ⁴⁰ Yezsuz daj cohsaenz dix hax: "Gaenqsu baenzrawz mbu baenzaqnaeh? Baenzaqrawz naengz mboq sinq gux mux?" ⁴¹ Paenqdix mbu daengz mboq zawh haxnyaeux, goanz lej cham goanz: "Dix zawh gawz mux? Daengz laemz daj naemx naengz biak dix!"

Yezsuz Ya Goanz Dij Pi Mwz Nandang

5 ¹ Yezsuz daj cohsaenz dix bae doiqfaeg aen kowZazliqliq, dih dij goanz puj Gowhlazsaenz ndowj naeh. ² Yezsuz hiamq daeq ndaw lowz loangz daeuj zoq mex goanz ux daeq ndaw ngomz aeu puj tai nyaengx naeh og daeuj. Goanz naeh zoah

^a4:24 "Gaenqsu nwh gajrawz, dij Sen zoq hawj gaenqsu ruxndeq gajrawz," gaemz naeh mbaednduq zawh hax: *Su aeu gaeng chau, dij Sen goj aeu gaeng chau hawj su.*

^b4:31 Faenz jeqchaliq ix daj maed lugngaz dungzlumj; go dix sung song vaz lai.

dij pi mwz ndang. ³ Goanz naeh zwzrawz goj yuq ndaw ngomz aeu puj tai nyaengx naeh ndowj, mboq miz gawz puk dix ndaej, daengz aeu tiksaed puk naengz gaemx mboq ndaej. ⁴ Koax daekgoanq daenh aeu tiksaed puk ka dix, gaj zoah dix tip kaed, baenzaqnaeh gawz goj dih aeu dix hoakrawz mboq miz. ⁵ Dix vaenzlinzhwnz yuq dih aen ngomz aeu puj tai nyaengx naeh daj yuq ndaw bo rongx vit rongx gangh. Mbangjzww naengz aeu tin dup ndang hoakri dix. ⁶ Gaunaeh, dix naengz liq yaengh hongj, zoq leztaen Yezsuz, cenq lenh maz gvih mwz doq Yezsuz. ⁷ Dij pi daeh rongx: "Yezsuz, mawz zawh lug zaiz dij Sen dwx nyeuz daengzle naeh, mawz baenzaqrawz daet gux? Vanz mawz laek vazkuz gux! Yuq doqnaj dij Sen yinq gux." ⁸ Dij pi baenzaqrawz hoakzaqnaeh hax, zawh Yezsuz haeuz hoakzaqnaeh hax dix: "Dij pi, daeq ndaw ndang goanz naeh og daeuj!" ⁹ Yezsuz cham dij pi: "Minxzwh mawz rongx hoak gawz?" Dij pi hax: "Gaenqpiu miz do lai, minxzwh zoq rongx hoak Boangx." ¹⁰ Yaq dix daeuq vanz Yezsuz, vanz bae vanz dauh, vanz Yezsuz laek hawj paenqdix ni dih naeh. ¹¹ Zwz naeh, miz yaengh boangx mu yuq le haenzhenz bo naeh cha gaenqjin. ¹² Boangx dij pi naeh zoq vanz Yezsuz: "Vanz mawz hawj piu mwz ndaw boangx mu naeh mah. Hoakzaqnaeh gaenqpiu ndaej mwz ndang dij mu." ¹³ Yezsuz zoq hawj paenqdix mwz, dij pi zoq daeq ndaw ndang goanz naeh daeuj, mwz ndaw ndang boangx mu naeh. Daengz boangx mu, teq song tiang do ux naeh, lenh bae aen ndanq haenz kow naeh, doak bae ndaw kow, daengzle zaem tai nauq. ¹⁴ Boangx dawz mu naeh gaj goanz gaj lenh ni; paenqdix lenh mwz

hangzhw, bae ka'mowngz, haxdoq daenh sowh saeh naeh, daengzle zoq maz lez zawh gaeng saeh. ¹⁵ Maz taeng dih Yezsuz naeh, leztaen goanz mbaednduq zoah boangx dij pi mwz ndang naeh, haeuz nungh sowj yaq, naengh yuq dih naeh dinghleuj, paenqdix zoq mbu taeuq. ¹⁶ Sowh puj ndaejtaen suq saeh goanz dij pi mwz ndang naeh daj ndaejtaen suq saeh boangx mu doak bae ndaw kow naeh zoq laemh dwk daengzle. ¹⁷ Dij goanz dih naeh zoq vanz Yezsuz ni dih paenqdix. ¹⁸ Gau Yezsuz kwnj mwz ndaw lowz naeh, goanz mbaednduq zoah dij pi mwz ndang naeh maz vanz Yezsuz: "Vanz mawz hawj gux nowngz mawz bae ndoij." ¹⁹ Yezsuz mboq hawj dij nowngz, gaj daj dix hax: "Mawz dauh mwz rownz, mwz haxdoq bihnongx rownz mawz Zaeuj saeh mawz gajrawz dwx, dix hoakrawz zawchaej mawz, gaj yowngh gaj laemh dwk paenqdix." ²⁰ Goanz gaengnaeh ni yaq, zoq bae mbanj Dixzazpozlix naeh laemh dwk daenh mbaed saeh Yezsuz saeh dix naeh. Gawz ruxnyinz gawz goj sawz.

Lugnyingz Yeznuq Daj Goanz Nyingz Ux

²¹ Yezsuz daeuq naengh lowz bae doiqfaeg kow Zazliqliq, miz yaengh boangx goanz maz henz dix, dix in yuq henz kow. ²² Miz goanz ux, minxzwh rongx hoak Yeznuq, dix gvanx rownzndawcowq dih naeh. Dix goj maz, daeh taen Yezsuz, zoq gvih bae doqnaj Yezsuz, ²³ vanz dix: "Lugnyingz gux zaekgaj tai yaj, vanz mawz bae aeu mungz baed ndang dix, hawj dix ndae, jeuq dix aen mingh ux." ²⁴ Yezsuz zoq daj Yeznuq zaemh dauh bae.

Miz yaengh boangx dij goanz nowngz dix, nyenj maz haenz dix. ²⁵ Dih naeh miz goanz nyingz ux

baihdawj dix gaj vaenz gaj baenz sowh chaej lowd lae naeh, haeuz baenz ndaej sipngih bi. ²⁶ Dix bae dih bae dih hawj puj ya chaej lez, ngaenzjenz aeu ya chaej nauq. Gaj aen chaej goj mboq taen ndae nyeuz saek'i. Gajfa gaj vaenz laeng lej gaj chaej naek, gaj yowngh kaem gaj ndaej jin nauq. ^{27–28} Dix ruxnyinz su saeh Yezsuz naeh, ndaw zaw nwh: "Nanghgaj gux lumh zoah gongzsowj dix, aen chaej gux zoq ndae saw." Yaq dix zoq nyenj mwz, nyenj mwz taeng baihlaeng Yezsuz, lumh gongzsowj dix. ²⁹ Dix daeh lumh, sowh dih lowd lae naeh cenq mbaet zaeh. Dix ruxndeq aen chaej ndang dix ndae. ³⁰ Yezsuz mbaeddoag daeh ruxndeq doakriangz dix daeq ndaw ndang og bae, zoq yuq jeh goanzlai ueqnaj dauh bae, cham: "Gawz lumh sowj gux ah?" ³¹ Cohsaenz dix cham dix: "Miz goanz lai baenzaqnaeh nyenj mawz, mawz baenzaqrawz naengz cham zawh gawz lumh mawz ah?" ³² Gaj Yezsuz lez bae haenzhenz, lez zawh gawz lumh dix.

³³ Goanz nyingz naeh ruxndeq aen chaej dix ndae yaq, ndaw zaw mbu daengz saenq rowdrowd saw. Goanz nyingz naeh zoq gvih bae doq Yezsuz, haxdoq dix nauq. ³⁴ Yezsuz daj dix hax: "Lugnyingz, mawz sinq gux, mawz ndaej jeuq yah, mawz dauh bae vangq dangh ndeh! Aen chaej mawz ndae eh!"

³⁵ Kauq Yezsuz naengz hax mboq nauq, zoq miz dij goanz daeq rownz Yeznuq maz haxdoq Yeznuq: "Lugnyingz mawz haeuz tai yaq, mawz naengz maz mahfanh lauxswz hoak gaeng maj?"

³⁶ Yezsuz ruxnyinz gaemz kauq naeh yaq, zoq daj Yeznuq hax: "Laek mbu! Nanghgaj sinq!" ³⁷ Yaq dix zowz sam goanz cohsaenz dix, Bihdowh, Yaqgowh, Yezhanq goanz nongx Yaqgowh naeh bae, mboq

hawj daenh nowngz. ³⁸ Paenqdix maz taeng rownz Yeznuq, Yezsuz taen miz dij goanz zuk nyauznyauz, haej vauhvauh. ³⁹ Yezsuz ndonj mwz ndaw rownz daj paenqdix hax: "Gaenqsu baenzaqrawz haej vauhvauh ah? Ndiq lug naeh lej mboq zawh tai, dix zawh noanzlaep naeuj." ⁴⁰ Gaj paenqdix kosaemj dix, Yezsuz zoq daem paenqdix og nog, hawj gaj bohmech ndiq naeh daj sam goanz cohsaenz dix daj dix zaemh mwz ndaw ruk ndiq naeh. ⁴¹ Dix laeg qen ndiq naeh, aeu kauq paenqdix daj dix hax: "*Daqliqdaq, guxmiz!*" Zoq zawh hax: "Ndiq nyingz aj, dwnq maz!" ⁴² Ndiq nyingz naeh mbaeddoag dwnq maz, daeq. Zwz naeh ndiq naeh haeuz ndaej sipngih bi. Mbaed saeh naeh hawj daengzle sawz taeuq! ⁴³ Yezsuz menq nemz dij goanz aeu kaeujpyaek maz hawj ndiq naeh jin, menq haxdoq daengzle mboq hawj gawz ruxndeq mbaed saeh naeh.

Dij Goanz Goakrownz Yezsuz Ywjhwnq Dix

6 ¹ Yezsuz ni dih gaengnaeh, dauh bae goakrownz dix. Cohsaenz dix goj daj dix zaemh bae. ² Taeng Vaenz Cednoiq, dix yuq rownzndawcowq zau daenh. Gawz ruxnyinz kauq dix gawz goj sawz. Daenh hax: "Goanz naeh mwz rawz ndaej sowh mbaedmungz naeh mux? Gawz hawj dix sowh aen gvai naeh mux? Dix naengz rux hoak sowh saeh saenh yaengh saenh naeh! ³ Dix zawh puj zanghmaex naeujmax? Dix zawh lug zaiz Maxliqyaq, goz Yaqgowh, Yezciz, Yaeuhdaq, Cizmaenh naeujmax? Daengz boangx nongx nyingz dix goj yuq dih raeuz inxnaeh ndowj naeuj max?" Yaq paenqdix zoq lez mboq ndaej dix. ⁴ Yezsuz

daj paenqdix hax: "Su ruxndeq: Pujzawxkauq dij Sen, gawz gojvenj, yuq ndaw goakrownz hoakri, yuq changz rownz hoakri, yuq ndaw rownz hoakri, mboq miz gawz zaenzzungq goah, gaj yuq dihdai daenh zaenzzungq dix." ⁵ Baenzaqnaeh, Yezsuz yuq dih naeh mizgaj aeu mungz baed now jij goanz puj chaej ux, ya paenqdix ndae, gvaqmaz mboq rux hoak sowh saeh saenh yaengh saenh gaenq ndai tem. ⁶ Dix sawz taeuq, dij goanz goakrownz dix naengz mboq sinq dix.

Yezsuz Nemz Sipngih Goanz

Dij Goanz Zawxkauq Dix

Yaq dix daeuq bae le longq haenzhenz naeh zau daenh. ⁷ Dix rongx sipngih goanz dij goanz zawxkauq dix maz, yaq nemz paenqdix song goanz song goanz og bae, doiq ux bae dih ux, zau daenh. Yezsuz goj aeu sowh qenhliq rux daem dij pi naeh hawj paenqdix. ⁸ Yaq naengz saengq paenqdix: "Gaenqsu og bae, tw gaj laenj maexdaeux ux yaq, gvaqmaz gaeng goj laek tw. Laek tw gaenqjin, laek tw aen daeh, goj laek laep jenz. ⁹ Nungh guh haiz doag, nungh tauq ndangnungh doag zoq baenz." ¹⁰ Dix daj paenqdix hax: "Su bae taeng dih rawz, rownz gawz venq hawj su ndowj, su zoq yuq rownz gawz ndowj, taengdiak su ni dih naeh. ¹¹ Jixzawh miz saek dih mboq venq hawj su ndowj, goj mboq biak gaenqsu, gaenqsu ni zwzrawz, chaeuq mowdmoanz ndaw din su ni. Hoakzaqnaeh zawh hax paenqdix hoak mboq hoj." ¹² Paenqdix zoq og bae zau daenh, yaix daenh hoak loang yauq gaix.

¹³ Paenqdix goj daem dij pi lai taeuq, aeu yuz lup puj chaej goanz lai taeuq, ya aen chaej paenqdix ndae.

Yezhanq Hoakrawz Zoah Daenh Kaj

¹⁴ Zwz naeh, minxzwh Yezsuz haeuz leuz bae dih bae dih, laux hongz Cizlih goj ruxnyinz yaq. Dix ruxnyinz mbangjgoanz hax: "Goanz naeh daj Yezhanq goanz saeh daenh hoak diauq zauh soiq naeh zawh zaemh goanz. Yezhanq tai yaq daeuq zaeu, baenzaqnaeh dix rux hoak sowh saeh saenh yaengh saenh naeh." ¹⁵ Mbangjgoanz hax Yezsuz zawh Yixliqyaq.^c Mbangjgoanz hax Yezsuz zawh puj zawxkauq dij Sen, lumj goanz ux sowh zwzpujjeq puj zawxkauq dij Sen naeh. ¹⁶ Gaj laux hongz Cizlih ruxnyinz yaq zoq hax: "Dix zawh Yezhanq, gux daet to dix yaq, dix daeuq zaeu yah!"

^{17–18} Mbaednduq laux hongz Cizlih haeggaj raep Cizloahdix yah mez nongx zaiz dix naeh. Cizlih hoakzaqnaeh hoak, Yezhanq ndaej hax Cizlih jijgaj mbaed: "Mawz raep mijmez nongx mawz hoak mez, hoakzaqnaeh mboq hoj." Hoakzaqnaeh, Cizlih nemz dij goanz bae puk Yezhanq, aeu Yezhanq kaeng bae ndaw lauz. ¹⁹ Yaq ndaw zaw Cizloahdix zoq hwnq Yezhanq, daz kaj Yezhanq, gaj naengz kaj mboq baenz. ²⁰ Cizlih mbu Yezhanq, dix ruxndeq Yezhanq zawh goanz ux gaemz hax mboq miz, zawh puj saw, dix zoq mboq hawj Cizloahdix kaj Yezhanq. Cizlih biak Yezhanq laemh kauq yaq, ndaw zaw zoq yuq mboq vangq saek'i, gaj dix goj naengz ngaiq biak Yezhanq koanx.

²¹ Cizlih mboq hawj Cizloahdix kaj Yezhanq, gaj miz vaenz ux, zawh sowh vaenz gaeuq Cizlih

^c6:15 *Yixliqyaq* zawh zwzpujjeq puj zawxkauq dij Sen.

zowngx naeh, dix qingj puj saeq dwx, sowh puj saeq gvanx bin naeh daj dij goanz Zazliqliq sowh puj miz najta naeh maz hoak qiang. ²² Lugnyingz Cizloahdix ndonj maz tiauw hawj puj qiang dix lez, Cizlih daj puj qiang dix gaj goanz gaj faengz taeuw. Cizlih zoq daj ndiq nyingz naeh hax: "Mawz zawx aeu gaeng, nanghgaj mawz daj gux hax, gux gaeng goj aeu hawj mawz!" ²³ Yaq naengz yuq doqnaj daengzle daj ndiq naeh haxgoak daekgoanq: "Nanghgaj mawz daj gux hax, daengz mawz aeu dih gux inxnaeh mbengj ux, gux goj hawj mawz." ²⁴ Yaq ndiq naeh og bae cham meh dix: "Gux aeu gaeng ndae nyeuz mux?" Cizloahdix haxdoq ndiq naeh: "Aeu to Yezhanq goanz saeh daenh hoak diauw zauh soiq naeh!" ²⁵ Ndiq naeh zoq gajbaeuh-gajbeh mwz doqnaj laux hongz, daj laux hongz hax: "Vanz laux hongz gannaeh cenq aeu to Yezhanq goanz saeh daenh hoak diauw zauh soiq naeh maz nyaengx ndaw baed hawj gux!" ²⁶ Mbaed naeh hawj Cizlih hoakraix taeuw, gaj dix haeuz ndaej daj ndiq naeh haxgoak yaq, yauq naengz zawh yuq doqnaj puj qiang haxgoak mawj, dix zoq awj ndiq naeh. ²⁷ Dix cenq nemz goanz bin ux bae kaj Yezhanq, aeu to Yezhanq maz. Goanz bin naeh og bae, mwz ndaw lauz kaj Yezhanq, ²⁸ aeu to Yezhanq nyaengx ndaw baed maz, hawj ndiq nyingz naeh. Ndiq nyingz naeh daeuq aeu hawj meh dix. ²⁹ Cohsaenz Yezhanq ruxnyinz mbaed saeh naeh, zoq maz aeu Yezhanq bae haem ndaw mohbujreuh.

Suanq Gaj Puj Zaiz, Yeysuz Hawj

Haj Tiang Goanz Jin Imq

³⁰ Le goanz dij goanz zawx kauq Yeysuz naeh dauh maz dih Yeysuz naeh, haxdoq Yeysuz paenqdix hoak gaengraeuh daj zau gaengraeuh. ³¹ Gaj gaunaeh miz dij goanz bae'dauh lai gvaq, paenqdix gau jin kaeuj naengz mboq miz, Yeysuz zoq daj paenqdix hax: "Maz, gaj le goanz gaengraeuz haeggaj mwz ndaw doanghmowz cednoiq gau ux." ³² Paenqdix zoq daeq mwz ndaw lowz, gaj le goanz paenqdix haeggaj ni mwz ndaw doanghmowz. ³³ Gaj puj ndai leztaen paenqdix ni bae, miz dij goanz ruxnaj paenqdix lai taeuw, gaj longq gaj miz dij goanz maz, lenh mwz dih gaengnaeh, naengz mwz taeng daekgoanq paenqdix. ³⁴ Yeysuz cenq loangz ndaw lowz daeuj zoq leztaen yaengh boangx dij goanz. Dix leztaen boangx goanz naeh daj dij mbej mboq miz zaeuj dawz dungzlumj, dix zawchaej paenqdix, zoq zau paenqdix lai taeuw. ³⁵ Fax zaekgaj ndaem, cohsaenz Yeysuz maz daj Yeysuz hax: "Inxnaeh zawh ndaw doanghmowz, fax haeuz zaekgaj ndaem, ³⁶ hawj paenqdix byaeg yaj, hoakzaqnaeh paenqdix zux haeggaj mwz le longq haenzhenz inxnaeh swx gaenqjin jin." ³⁷ Gaj Yeysuz yaeng paenqdix: "Gaenqsu aeu gaenqjin hawj paenqdix jin maj!" Cohsaenz dix hax: "Mawz hawj gaenqpiu aeu yaengh song baeg downnah ngaenz swx binx maz hawj paenqdix jin wznaex?"^d ³⁸ Yeysuz hax: "Gaenqsu bae lez gaenqsu miz gajrawz binx?" Paenqdix lez yaq zoq hax: "Haj aen binx daj song do bya." ³⁹ Yeysuz zoq nemz daengzle hoak boangx hoak boangx naengh ndaw now nyaj.

^d6:37 Zwz naeh goanz puj hoak gaengx ux hoak gaengx vaenz ux zoq ndaej downnah ngaenz ux.

⁴⁰ Yaq daengzle zoq naengh daeuj, mbangj boangx miz hajsip goanz, mbangj boangx miz baeg goanz.

⁴¹ Yezsuz aeu haj aen binx daj song do bya maz, ngangh to, lez mwz ndaw fax, mbaiq dij Sen. Yaq aeu mungz dix peg binx yenh hawj cohsaenz dix, cohsaenz dix zoq aeu hawj daengzle. Goj daeuj hoakzaqnaeh aeu song do bya baen hawj daengzle.

⁴² Daengzle gaj goanz gaj jin, yaq gawz goj jin imq yaq. ⁴³ Le goanz cohsaenz Yezsuz zoq bae zaep sowh dij bya daj binx jin low naeh, aeu laep ndaej sipngih ka choiq. ⁴⁴ Dij goanz jin binx, suanq gaj puj zaiz zoq miz haj tiang goanz.

Yezsuz Yuq Now Naemx Daeq

⁴⁵ Gvaq mbaed saeh naeh yaq, Yezsuz cenq yaix cohsaenz dix kwnj mwz ndaw lowz, nemz paenqdix mwz doiqfaeg aen kow longq Boahsaiqdaq naeh daekgoanq dix, dix yuq doaklaeng yaix daengzle dungzbyaeg. ⁴⁶ Dix ni paenqdix, zoq mwz ndaw bo daj dij Sen hax kauq. ⁴⁷ Taeng zang'haemh, lowz haeuz uaij mwz taeng jinghzang kow, gaj Yezsuz naengz haeggaj yuq dihliangx. ⁴⁸ Dix leztaen cohsaenz dix uaij lowz nanh taeuq, zawh laemz baeuq maz baih lowz bae naeh. Gau fax zaekgaj rungh naeh, Yezsuz yuq now naemx daeq bae doq paenqdix, daz gvaq haenz paenqdix. ^{49–50} Cohsaenz dix leztaen dix yuq now naemx daeq, faeklahi zawh dij pi. Paenqdix daengzle leztaen dix, mbu daengz mboq zawh haxnyaeux, baenzzaqnaeh paenqdix zoq daeh rongx. Gaj Yezsuz zoq cenq daj paenqdix hax: "Yuq vangqdangh! Zawh gux, laek mbu." ⁵¹ Yaq dix

kwnj mwz ndaw lowz, daj paenqdix zaemh yuq, laemz zoq mboq baeuq. Cohsaenz dix sawz taeuq.

⁵² Unj paenqdix naengz mboq ruxndeq mbaed saeh baen binx naeh zawh hax gaeng, ndaw zaw paenqdix naengzgaj mboq gong saek'i.

Yezsuz Ya Pujchaej Gowhnihsaxlowh Ndae

⁵³ Paenqdix kamj gvaq kow, zoq mwz dihliangx Gowhnihsaxlowh, aeu aen lowz lamh ndae.

⁵⁴ Hiamq daeq ndaw lowz daeuj, cenq miz dij goanz ruxnaj Yezsuz, ⁵⁵ dij goanz dih naeh daeq daengz mbanj naeh nauq, paenqdix aeu puj chaej nyaengx ndaw faz, ruxnyinz Yezsuz bae rawz, zoq yaeuj bae rawz. ⁵⁶ Yezsuz bae rawz, dih ix dih dwx, daenh zoq aeu puj chaej nyaengx ndaw hw, paenqdix vanz Yezsuz hawj paenqdix lumh gaj din sowj dix zoq baenz eh, gawz lumh zoah, gawz zoq ndae.

Mboq Hawj Cholaeng Gaenq Zwzpujjeq

Zauh Hoak Naeh Ej Aeu Kauq Dij

Sen Viangh Bae Baih Ux

7 ¹ Miz dij goanz Fahliqsaiq daj jij goanz lauxswz zau *Sw Dij Sen* ux daeq Yezluqsaxlaengx maz, daengz paenq maz haenz Yezsuz.^e ² Paenqdix leztaen cohsaenz Yezsuz miz goanz aeu mungz mboq saw jin kaeuj, zoq zawh hax mbaed naeh cohsaenz Yezsuz miz dij goanz naengz mboq soiq mungz haeuz jin kaeuj.

³ Laemh maz ej zawh baenzzaqnaeh, dij goanz Fahliqsaiq daj daengzle puj Yaeuhtaiq nauq biak daj hoak gaenq zwzpujjeq zauh hoak naeh, jixzawh

^e7:1 Baih *Fahliqsaiq* zawh dij goanz puj Yaeuhtaiq. Paenqdix hax paenqdix biak fahlh Moahciz, gaj paenqdix goj zau daenh sowh gaenq zwzpujjeq zauh naeh.

mboq soiq mungz zoq mboq jin gaeng. ⁴Daeq ndaw hw dauh maz, mboq soiq mungz daekgoanq goj mboq jin gaeng, yaq naengz miz yowngh ndai zwzpujjeq zauh hoak naeh tem, paenqdix goj naengz gaj biak daj hoak. Baenzaq sauz zung, langx mbwnq, sauz za'hoq dongz loaj naeh, naengz miz tem.

⁵Baenzaqnaeh, dij goanz Fahliqsaiq daj lauxswz zau *Sw Dij Sen* cham Yezsuz: "Cohsaenz mawz baenzaqrawz mboq biak daj hoak gaenq zwzpujjeq zauh hoak naeh, baenzaqrawz aeu mungz mboq saw jin kaeuj?" ⁶Yezsuz daj paenqdix hax: "Yixsaiqyaq hax ndaej hoj zaeh, dix hax boangxsu baeg daj zaw mboq dungzlumj, ndaw sw dix hoakzaqnaeh mai:^f "Dij Sen hax:

"Dij goanz inxnaeh baeg lej hax zaenzzungq gux, gaj ndaw zaw ni gux gvae taeuq.

⁷Paenqdix aeu gaenq dij goanz zauh hoak naeh dang kauq gux zau daenh, daengz paenqdix biangz gux goj bowhbowh.^g

⁸Gaenqsu biak gaenq dij goanz zauh naeh, gaj gaenqsu mboq aeu kauq dij Sen nyaengxzaw."

⁹Yezsuz daeuq daj paenqdix hax: "Gaenqsu hoak gaj gaenq zwzpujjeq zauh hoak naeh. Hoakzaqnaeh

gaenqsu zoq aeu kauq dij Sen viangh bae baih ux.

¹⁰Moahciz hax: Yauq zaenzzungq bohme h mawz,^{hi} daeuq hax: Mang bohme h zoq zoah kaj.^j ¹¹Gaj gaenqsu ej zau daenh hoakzaqnaeh daj bohme h hax: Dez gux aj, meh gux aj, gaenq gaenqgux hoj aeu hawj su naeh, haeuz aeu leux hoak *goah'exbanx*." *Goah'exbanx* zoq zawh hax sowh gaenq aeu hawj dij Sen naeh. ¹²"Gaenqsu zoq hoakzaqnaeh hawj daenh mboq saeh bohme h dix hoak gaeng. ¹³Hoakzaqnaeh, gaenqsu aeu gaenq zwzpujjeq zauh hoak naeh nyaengx now kauq dij Sen. Gaenqsu naengz miz lai yowngh hoak daj sowh naeh dungzlumj."

¹⁴Yaq, Yezsuz daeuq rongx daenh maz, daj paenqdix hax: "Gaenqsu daengzle biak gux hax, goj ruxndeq zuxbaenz: ¹⁵Gaenqjin zawh gaenq daeq baihnog maz naeh, gaenqjin mboq rux hawj dij goanz mboq saw, gaenq daeq ndaw zaw bae naeh, zux rux hawj mboq saw." ¹⁶^{k17}Yezsuz ni daenh ndonj mwz ndaw rownz, cohsaenz dix zoq maz cham dix aen bixliq gaunduq dix hax naeh zawh hax gaeng. ^{18–19}Dix daj paenqdix hax: "Daengz gaenqsu goj daj puj ndai dungzlumj naengz mboq ruxndeq max? Gaenqjin daeq baihnog maz naeh mboq zawh mwz taeng ndaw zaw dij goanz, zawh bae taeng ndaw dongx dij goanz, yaq og bae

^f7:6 *Yixsaiqyaq*zawh zwzpujjeq goanz puj zawxkauq dij Sen ux. *Sw Dij Sen* miz bwnz ux zawh dix laiz.

^g7:7 Su kauq naeh haeuz yuq Sw *Yixsaiqyaq* 29:13.

^h7:10 *Moahciz*zawh zwzpujjeq goanz puj zawxkauq dij Sen ux. Dij Sen hawj dix mai fahlidij dij Sen, aeu sowh fahlidij naeh zau puj Yaeuhtaiq.

ⁱ7:10 Gaemz kauq naeh haeuz yuq Sw Ni Aizjih 20:12.

^j7:10 Gaemz kauq naeh haeuz yuq Sw Ni Aizjih 21:17.

^k7:16Inxnaeh mbanj bwnz miz gaemz naeh: *Miz mbawchu rux biak, zoq caqsiq biak!*

baihnoq. Baenzaqnaeh gaenqjin daeq baihnog maz naeh mboq rux hawj dij goanz mboq saw." Dix hoakzaqnaeh hax zawh hax gaenqjin, gaeng goj zawh gaenq saw.²⁰ Yaq dix daeuq hax: "Gaenq daeq ndaw zaw dij goanz og daeuj naeh, zux rux hawj dij goanz mboq saw.²¹ Sowh gaenq ndoag daeq ndaw zaw dij goanz og daeuj naeh zawh: puj zaiz daj puj nyingz mboq zawh po'mez goj zaemh noanz, hoaklaek, kaj goanz,²² baenzrownz yaq naengz bae naengh puj ndai, maeux, hoak gaenq ndoag, yai daenh, nyingzzaiz ngaiq daj gawz zaemh yuq zoq daj gawz zaemh yuq, ta'ndaem daenh, moakndai daenh, baegbongz, hoak gaenq uaj.²³ Sowh gaenq ndoag naeh zawh daeq ndaw zaw dij goanz og daeuj, sowh naeh zux rux hawj dij goanz mboq saw."

Yah Puj Faeznihjiz Naeh Mizzaw Sinq Taeuq

²⁴ Yezsuz daeq dih naeh mwz taeng mbanj Taiq'ex, ndonj mwz rownz ux, mbaednduq daz mboq hawj gawz ruxndeq, gaj miz dij goanz ruxndeq.²⁵ Miz yah ux, lug nyingz dix zoah dij pi mwz ndang, dix ruxnyinz suq saeh Yezsuz, zoq maz gvih bae baihnaj din Yezsuz.²⁶ Yah naeh mboq zawh puj Yaeuhtaiq, zawh puj Faeznihjiz daeq ndaw mbanj Ciqliqyaq naeh maz. Dix vanz Yezsuz daem dij pi ndaw ndang lug nyingz dix naeh ni.²⁷ Yezsuz daj dix hax: "Hawj lug jin imq goanq. Lug naengz jin mboq imq, aeu binx lug viangh hawj dij ma jin zawh mboq hoj."²⁸ Yah gaengnaeh yaeng dix: "Zaeuj aj, zawh zaeh lox. Gaj dij ma yuq dawj zongz, goj deq jin gaenq engliak hawj doak naeh."²⁹ Yezsuz daj dix hax: "Cholaeng gaemz kauq mawz naeh, mawz dauh

mwz ndeh, dij pi haeuz daeq ndaw ndang lug nyingz mawz og bae yaq eh."³⁰ Dix dauh mwz taeng rownz, leztaen lug dix yuq ndaw mungxfaz, dij pi haeuz og bae yaq.

Yezsuz Ya Goanz Chu'nog daj Mboq Rux Hax Kauq Ux Ndae

³¹ Yezsuz daeq ndaw mbanj Taiq'ex og bae, gvaq zoah Cizduq, dauh mwz taeng aen kow Zazliqliq baih mbanj Dixzazpozlix naeh.³² Miz dij goanz zowz goanz ux, yaeuq chu'nog, yaeuq linx nyaeb, hax kauq mboq baenz, maz dih Yezsuz naeh, vanz Yezsuz aeu mungz baed ndang dix, hawj dix ndae.³³ Yezsuz zowz dix daeq ndaw dih daenh yuq naeh og bae dih ux, aeu neuxmungz chuj ruz chu dix, pih naemxnaiz daz linx dix.³⁴ Ngangh to, lez mwz ndaw fax, daeh qaen mbaed yai ux, daj goanz gaengnaeh aeu kauq dix hax: "*Yixfahdaq*." "*Yixfahdaq*" zoq zawh hax: "Aj ndeh."³⁵ Chu goanz gaengnaeh cenq ruxnyinz, linx dix goj oanq, hax kauq baenz, hax sawrik.³⁶ Yezsuz nemz paenqdix mboq hawj paenqdix haxdoq gawz, dix gaj nemz paenqdix laek hax, paenqdix gajfa bae laemh dwk daenh.³⁷ Daengzle gawz ruxnyinz, gawz goj sawz taeuq, hax: "Suq dix hoak naeh, yowngh rawz goj ndae zaeh; dix rux hawj puj chu'nog ruxnyinz, goj hawj puj mboq rux hax kauq rux hax kauq!"

Hawj Siq Tiang Goanz Jin Imq

8¹ Ndauj gaengnaeh, daeuq miz yaengh boangx goanz maz zaemh yuq. Paenqdix yowngh jin mboq miz; Yezsuz rongx cohsaenz dix maz, daj

^{17:27} Inxnaeh Yezsuz hax "lug" zawh hax puj Yaeuhtaiq, hax "dij ma" zawh hax puj yowngh ndai.

cohsaenz dix hax: ²"Boangx goanz naeh haeuz daj gux zaemh yuq ndaej sam vaenz, gannaeh haeuz yowngh jin mboq miz yaj. Gux zawchaej paenqdix. ³Paenqdix mbangj goanz daeq gvae taeuq maz. Jixzawh gannaeh gux nemz paenqdix dungzbyaeg, hawj paenqdix dongxyaeg dauh mwz rownz, paenqdix rux yuq ka loh talaiz laemx." ⁴Cohsaenz dix yaeng dix: "Yuq ndaw doanghmowz inxnaeh, bae rawz cha gaenqjin hawj paenqdix jin imq mux?" ⁵Yezsuz cham paenqdix: "Gaenqsu naengz miz gajrawz binx ah?" Paenqdix yaeng: "Jiat aen." ⁶Yezsuz nemz daengzle naengh dihindin, dix gaem jiat aen binx gaengnaeh, mbaiq dij Sen, peg binx yenh hawj cohsaenz dix. Cohsaenz dix zoq aeu baen hawj daengzle. ⁷Paenqdix naengz miz jij do bya ixux, Yezsuz mbaiq dij Sen, zoq nemz cohsaenz dix aeu baen hawj daengzle. ⁸Daengzle gaj goanz gaj jin, gaj goanz gaj jin imq, sowh binx daj dij bya jin low naeh, zaep ndaej jiat ka choiq dwx. ⁹Suq dij goanz naeh miz teq siq tiang goanz ux naeh. Yezsuz nemz daengzle dungzbyaeg, ¹⁰zoq cenq daj cohsaenz dix kwnj mwz ndaw lowz, mwz taeng koax Daqmaxnuxtaz naeh.

Hawj Yezsuz Hoak Sowh Saeh Ndaw Fax Naeh

¹¹Miz dij goanz Fahliqsaiq og daeuj, daj Yezsuz dungzjinj. Paenqdix daeg Yezsuz, hawj Yezsuz hoak sowh saeh ndaw fax naeh hawj paenqdix lez. ¹²Yezsuz ruxnyinz gaemz naeh, zaw dix yuq mboq zaih, hax: "Zoh naeh baenzaqrawz cha gaj sowh saeh ndaw fax naeh mux? Gux haxdoq su swhlit, mboq rux miz sowh saeh ndaw fax naeh hawj zoh

naeh taen." ¹³Yaq Yezsuz ni paenqdix, daeuj kwnj mwz ndaw lowz kamj bae doiqfaeg.

Hem Fahfaenx Dij Goanz Fahliqsaiq

Daj Fahfaenx Laux hongz Cizlih

¹⁴Cohsaenz Yezsuz lumz laep binx, ndaw lowz zux miz aen binx doag, gaenqjin yowngh ndai gaeng goj mboq miz. ¹⁵Sowh gau naeh, Yezsuz saengq paenqdix: "Gaenqsu caqsiq hem, hem fahfaenx puj Fahliqsaiq daj fahfaenx laux hongz Cizlih." ¹⁶Cohsaenz dungzcham: "Dix hoakzaqnaeh hax, zawh hax gaenqraeuz mboq miz binx maj?" ¹⁷Yezsuz ruxndeq paenqdix nwh gaeng, zoq cham paenqdix: "Gaenqsu baenzaqrawz koanx sowh saeh mboq miz binx naeh mux? Gaenqsu naengz mboq ruxndeq maj? Zaw su naengzgaj mboq gong saekri maj? ¹⁸Gaenqsu miz ta mboq rux lez, miz chu mboq rux biak maj? Gaenqsu nyen mboq ndaej ej maj? ¹⁹Gux peg haj aen binx gaengnaeh hawj haj tiang goanz jin, gaenqsu zaep gaenqjin low naeh ndaej jij ka choiq ah?" Paenqdix yaeng: "Sipngih ka choiq." ²⁰Yezsuzdaeuj cham: "Jiat aen binx gaengnaeh hawj siq tiang goanz jin, gaenqjin low naeh gaenqsu zaep ndaej jij ka choiq dwx ah?" Paenqdix yaeng: "Jiat ka choiq dwx." ²¹Yezsuz hax: "Gaenqsu naengz mboq ruxndeq maj?"

Ya Goanz Ta Mbud Ux Ndae

²²Doaklaeng paenqdix mwz taeng longq Boahsaiqdaq, miz goanz zowz goanz ta'mbud ux maz doqnaj Yezsuz, paenqdix vanz Yezsuz lumh dix, hawj ta dix leztaen. ²³Yezsuz gaem mungz dix, zowz dix bae haenz longq, pih naemxnaiz mwz ta

dix, daeuq aeu mungz baed ndang dix, cham dix: "Mawz leztaen gaeng baeq?" ²⁴Goanz ta mbud ngangh to lez, hax: "Gux leztaen dij goanz daeq bae daeq dauh! Boangxdix daj biangxmaex dungz lumj." ²⁵Yaq Yeysuz daeuq aeu mungz baed bae ta goanz ta mbud naeh. Goanz ta mbud naeh ndowngq ta lez, ta dix zoq ndae, yowngh rawz goj taen singlaringh. ²⁶Yezsuz nemz dix dauh mwz rownz, Yeysuz yaix dix: "Daengz longq naeh mawz goj laek ndonj mwz."

Bihdowh Hax Yeysuz Zawh Jizduz

²⁷Yezsuz daj cohsaenz dix og bae, daz mwz le longq haenzhenz Kaixsaxliqyaq-faezlih bix naeh. Yuq doanh loh, Yeysuz cham cohsaenz dix: "Daenh hax gux zawh gawz?" ²⁸Cohsaenz dix yaeng: "Mbangj goanz hax mawz zawh Yezhanq goanz saeh daenh hoak diauq zauh soiq naeh; mbangj goanz hax mawz zawh Yixliqyaq;^m naengz miz dij goanz hax mawz zawh le puj zawxkauq dij Sen naeh goanz ux." ²⁹Yezsuz daeuq cham paenqdix: "Gaenqsu nix? Gaenqsu hax gux zawh gawz?" Bihdowh yaeng: "Mawz zawh Jizduz." ³⁰Yezsuz saengq paenqdix, saengq paenqdix laek haxdoq daenh suq saeh dix naeh.

Yezsuz Ruxndeq Dix Mwznaj Baenzaqrawz

³¹Daeq gannaeh mwz Yeysuz kwnz hoakzaqnaeh zau cohsaenz dix, dix hax: "Gux Lug Dij Goanz

ndaej jinkaem lai taeuq zuxbaenz. Mwznaj sowh puj saeq gvanx puj Yaeuhtaiq naeh, sowh goanz gvanx puj mbud dij Sen naeh, sowh lauxswz zau *Sw Dij Sen* naeh, paenqdix viangh gux, kaj gux, vaenz daih sam gaenggux zux daeuq zaeu." ³²Yezsuz hoakzaqnaeh hax swhlit yaq, Bihdowh zoq laeg Yeysuz bae haenz, hwt dix. ³³Yezsuz ueqlaeng maz, lez mwz doq cohsaenz dix, hwt Bihdowh hax: "Sazdanz,ⁿ ni bae baihlaeng gux. Mawz mboq nwh gaenq dij Sen, nwh ndaej gaj gaenq dij goanz." ³⁴Yaq Yeysuz rongx daengzle daj cohsaenz dix maz, daj paenqdix hax: "Jixzawh gaenqsu miz gawz zawx nowngz gux, zoq aeu gaenq gux nyaengx daekgoanq, aeu gaenq hoakri nyaengx doaklaeng, baz maexngamzchaz hoakri su maz nowngzlaeng gux.^o ³⁵Gawz zawx jeuq aen mingh dihndin naeh, gawz zoq laem aen mingh daengznauq. Gaj jixzawh gawz zawh cholaeng gux daj cholaeng kauqfaengz dij Sen viangh aen mingh dihndin naeh, gawz zoq jeuq ndaej aen mingh daengznauq naeh. ³⁶Jixzawh dij goanz gawz ndaej daengz dawjfax nauq, gaj dix zawh aeu aen mingh dix bae lwh, hoakzaqnaeh daengz ndaej goj bowhbowh ndaej. ³⁷Dij goanz naengz rux aeu gaeng lwh aen mingh hoakri dauh maz mux? ³⁸Zoh mbowq, zoh nowngz dij Sen mboq singj mboq ringh naeh, gawz aeu gux daj kauq gux hoak gaenq laizlom, mwznaj gux Lug Dij goanz miz najta Dez ndaw fax daj boangx bin dij Sen zaemh

^m8:28 *Yixliqyaq* zawh zwzpujjeq goanz puj zawxkauq dij Sen ux. Lez Sw Laux hongz Bwn Daih Aet Naeh, Sw Laux hongz Bwnz Daih Ngih Naeh.

ⁿ8:33 *Sazdanz* zawh do gvanx dij pi naeh.

^o8:34 Zwzpujjeq bin Loahmax aeu puj fanzoiq lamh mwz *maexngamzchaz*, yaq hawj paenqdix tai.

loangz daeuj zwzrawz, gux goj aeu dix hoak gaeng laizlom."

9¹ Yezsuz daeuq daj paenqdix hax: "Gux haxdoq su swhlit: in yuq inxnaeh, miz dij goanz naengz mboq tai rux ndaej taen goh dij Sen miz doakriangz dwx taeuq daeuj."

Yezsuz Yuq Ndaw Bo Byenq Rungh Taeuq

² Gvaq ndaej choak vaenz yaq, Yezsuz zowz gaj Bihdowh, Yaqgowh, Yezhanq kwnj mwz aen bo ux sung taeuq. Yezsuz yuq doqnaj paenqdix byenq nauq. ³ Ndangnungh Yezsuz rux rungh, kau daengz mboq zawh haxnyaeux; dihndin mboq miz saek yowngh paeng kau baenzaqaeh. ⁴ Cohsaenz Yezsuz faekfongh leztaen Yixliqyaq daj Moahciz ndoij.^p Yixliqyaq, Moahciz daj Yezsuz laemhkauq. ⁵ Bihdowh leztaen paenqdix yaq, dix daj Yezsuz hax: "Lauxswz, gaenqpiu yuq inxnaeh ndae zaeh! Gaenqpiu daengj sam aen zangjpungh, aen ux daengj hawj mawz, aen ux daengj hawj Moahciz, aen ux daengj hawj Yixliqyaq." ⁶ Paenqdix mbu taeuq, Bihdowh zoq nanghgaj hax gaemz naeh. ⁷ Miz kvaix pajfax ux maz, yaz zoah paenqdix, yaq daeuq miz hiangkauq daeq ndaw pajfax daeuj, hax: "Goanz naeh zawh lug zaiz gux, gux ngaiq dix, gaenqsu yauq biak dix." ⁸ Cohsaenz cenq lez bae haenzhenz, leztaen gaj Yezsuz daj paenqdix yuq, gvaqmaz gaeng goj lez mboq taen.

⁹ Gau paenqdix daeq ndaw bo loangz daeuj naeh, Yezsuz saengq paenqdix: "Gux Lug Dij Goanz

naengzbaeq tai yaq daeuq zaeu, laek aeu suq su taen naeh haxdoq gawz." ¹⁰ Cohsaenz dix aeu gaemz

kauq dix naeh nyaengxzaw, paenqdix dungzcham: "Tai yaq daeuq zaeu zawh hax gaeng mux?"

¹¹ Paenqdix daeuq cham Yezsuz: "Baenzaqrawz sowh lauxswz zau *Sw Dij Sen* naeh hax Yixliqyaq daeuj daekgoanq Jizduz zuxbaenz wzmux?"

¹² Yezsuz hax: "Yixliqyaq daeuj daekgoanq zaeh, dix daeuj dox daengzle nyaengxtaj,^q gaj ndaw *Sw Dij Sen* goj hax Lug Dij Goanz rux ndaej jinkaem lai taeuq, zoah daenh lezmoqqix. ¹³ Gux haxdoq su swhlit, Yixliqyaq haeuz daeuj yaq, gaj paenqdix ngaiq hoakrawz doiq dix zoq hoakrawz doiq dix, daj ndaw *Sw Dij Sen* hax dix naeh dungzlumj."

Yezsuz Daem Do Pi Hawj Dij Goanz

Mboq Rux Hax Kauq Naeh

¹⁴ Yezsuz daj sam goanz cohsaenz dix dauh daeuj taeng dih cohsaenz ndai naeh, leztaen miz yowngh boangx goanz homx paenqdix, naengz miz lauxswz zau *Sw Dij Sen* naeh daj paenqdix dungzjinj. ¹⁵ Gawz leztaen Yezsuz, gawz goj sawz taeuq, ndaw zaw gawz goj gaj dug gaj dik, daengzle lenh mwz raep dix. ¹⁶ Yezsuz cham cohsaenz dix: "Gaenqsu daj paenqdix dungzjinj gaeng ah?" ¹⁷ Dih naeh miz goanz ux yaeng dix: "Lauxswz, gux zowz lug zaiz gux maz dih mawz inxnaeh, dix zoah sowh dij pi hawj dij goanz mboq rux hax kauq naeh mwz ndang. ¹⁸ Yuq dih rawz gojvenj, dij pi jenj dix, hawj dix laemx, baeg dix zoq miz fogfauz

^{p9:4} *Yixliqyaq* daj *Moahciz*, doiq naeh zawh zwzpujjeq puj zawxkauq dij Sen. *Moahciz* mai fahlit dij Sen, *Yixliqyaq* hoak sowh saenh yaengh saenh naeh. Lez Sw Ni Aizjih, Sw Laux hongz Bwnz Daih Aet Naeh, Sw Laux hongz Bwnz Daih Ngih Naeh.

^{q9:12} Inxnaeh Yezsuz nwh ndaej gaemzkauq ndaw Sw Maxlazjiz 4:5-6.

daeu, gaet faenz, daengz ndang nyaeb nauq. Gux qingj cohsaenz mawz daem dij pi ni, gaj paenqdix hoak mboq taeng." ¹⁹ Yezsuz hax: "Aeh! Dij goanz zoh su gannaeh naengz mboq sinq dij Sen ah! Gux haeuz daj su zaemh yuq ndowj baenzaqnaeh, gaenqsu naengz mboq sinq. Gaenqsu naengz daz hawj gux daj su yuq taeng zwzrawz mux? Gux gaemx taeng zwzrawz mux? Zowz dix maz dih gux inxnaeh ndeh." ²⁰ Paenqdix zoq zowz maeng lug naeh maz doqnaj Yezsuz. Do pi naeh daeh leztaen Yezsuz zoq cenq hawj maeng gaengnaeh saenq rowdrowd, laemx bae dihndin, fan bae fan dauh, baeg dix miz fogfauz daeu. ²¹ Yezsuz cham dez maeng naeh: "Dix daeq zwzrawz maz baenz sowh chaej naeh?" Dez maeng naeh yaeng: "Dix daeq zwz ix maz zoq bwnz baenzaqnaeh. ²² Dij pi kwnz aeu dix viangh bae ndaw faez, ndaw naemx, daz hawj dix tai. Jixzawh mawz rux hoak gaeng, vanz mawz zawchaej gaenqpiu, saeh gaenqpiu." ²³ Yezsuz daj dix hax: "Zawh mawz naengz mboq sinq zux hoakzaqnaeh hax. Gawz sinq, gaeng goj rux." ²⁴ Dez maeng gaengnaeh cenq daeh hax: "Gux sinq! Gaj gux naengz mboq sinq nauq, vanz mawz saeh gux, hawj gux sinq nauq." ²⁵ Yezsuz leztaen daengzle homx maz haenz dix, zoq hwt do pi naeh: "Do pi hawj dij goanz mboq rux hax kauq, mboq ruxnyinz gaeng naeh, gux nemz mawz daeq ndaw ndang goanz naeh og daeu, laek daeuq mwz ndang dix." ²⁶ Do pi naeh daeh rongx, hawj maeng naeh saenq rowdrowd, zoq og daeu. Maeng lug naeh daj tai dungzlumj, baenzaqnaeh daengzle hax: "Dix tai eh!" ²⁷ Gaj Yezsuz laeg mungz dix, fowz dix dwnq

maz, maeng naeh zoq dwnq maz. ²⁸ Yezsuz ndonj mwz ndaw rownz yaq, cohsaenz dix zoq haeggaj cham dix: "Baenzaqrawz gaenqpiu daem do pi naeh daeu mboq baenz mux?" ²⁹ Yezsuz daj paenqdix hax: "Sowh dij pi naeh, mizgaj vanz dij Sen zux daem daeu baenz."

Yezsuz Daeuq Hax Dix Rux Zoah Daenh Kaj Daj Rux Daeuq Zaeu

^{30–31} Paenqdix daeq dih gaengnaeh og bae, gvaq zoah mbanj Zazliqliq. Gaunaeh dix daz zau cohsaenz dix. Baenzaqnaeh, dix mboq zawx hawj daenh ruxndeq dix yuq rawz. Dix zau cohsaenz dix: "Gux Lug Dij Goanz mwznaj zoah aeu mwz hawj daenh, paenqdix kaj gux, gux tai yaq vaenz daih sam zux daeuq zaeu." ³² Cohsaenz dix mboq ruxndeq dix hax gaeng, goj mboq ganz cham dix.

Cohsaenz Dungzjinj Zawh Gawz DwX Nyeuz Daengzle

³³ Paenqdix maz taeng longq Zazbowhnungh. Gau paenqdix yuq ndaw rownz naeh, Yezsuz cham paenqdix: "Gaenqsu yuq ka loh dungzjinj gaeng ah?" ³⁴ Paenqdix yuq ka loh dungzjinj yuq goh dij Sen paenqdix zawh gawz dwx nyeuz daengzle,^r baenzaqnaeh gawz goj mboq ganz goak. ³⁵ Yezsuz naengh daeu, rongx sipngih goanz cohsaenz dix maz, daj paenqdix hax: "Gawz zawx hoak goanz dwx nyeuz daengzle, gawz zoq hoj hoakzaq sowh goanz doaklaeng daengzle naeh, hoj hoakzaq puj koj naeh kvej daengzle goanq." ³⁶ Yaq Yezsuz zowz goanz puj'ix ux maz, hawj dix in yuq jinghzang

^r9:34 *Yuq goh dij Sen*, gaemz kauq naeh zawh yuq Sw Maxtaiq Laiz Kauqfaengz Yezsuz Naeh 18:1.

cohsaenz dix, yaq dix umj goanz puj'ix naeh daj paenqdix hax: ³⁷ "Nanghgaj gawz cho zwh gux ej doiq sowh goanz daj goanz puj'ix dungzlumj naeh ndae, zoq zawh doiq gux ndae. Nanghgaj doiq gaenqgux ndae, mboq zawh doiq gaj gux ndae, doiq daengz laux nemz gux daeuj naeh ndae."

Mboq Daet Raeuz Zoq Zawh

Daj Raeuz Zaemhbaih.

³⁸ Yezhanq daj Yezsuz hax: "Lauxswz, miz mbaed ux gaenqpiu leztaen miz goanz ux aeu zwh mawz daem dij pi, gaj gaenqdix mboq nowngz gaenqraeuz, gux zoq daet dix, mboq hawj dix hoak." ³⁹ Yezsuz hax: "Laek daet dix. Mboq miz gawz aeu zwh gux hoak sowh saenh yaengh saenh naeh, yaq cenq daeuq rux haxmbowq gux. ⁴⁰ Mboq daet raeuz zoq zawh daj raeuz zaemhbaih. ⁴¹ Nanghgaj gawz cholaeng gux aeu naemx hawj su ndut saek umq, gux haxdoq su swhlit, gux mboq rux hawj dix hawj su daengzndai.

Coak Daenh Hoakloang

⁴² "Sowh puj sinq gux naeh, mbangj goanz sinq gux naengz daj puj'ix dungzlumj. Jixzawh gawz hawj sowh goanz naeh goanz ux faedlaemx, goanz hawj daenh faedlaemx naeh gangzmas hawj daenh aeu aen hux qiat goakhoz dix, yaq aeu dix viangh bae ndaw haij tai naengz ndae nyeuz ej. ⁴³ Jixzawh

mawz miz mungz ux hawj mawz faedlaemx, zoq daet dix ndeh. Mawz mboq miz mungz ux gaj mawz ndaej aen mingh daengznauq naeh, ndae nyeuz tai yaq daengz song mungz bae dih dij Sen aeu hoak dih chaenxfah naeh, bae dih faez maej mboq rux ndaep naeh. ⁴⁴ ^{s45} Jixzawh mawz miz ka ux hawj mawz hoak loang dij Sen, zoq daet dix ndeh. Mawz ka'ndiak gaj ndaej aen mingh daengznauq naeh, ndae nyeuz mawz tai yaq miz song ka bae dih dij Sen aeu hoak dih chaenxfah naeh. ⁴⁶ ^{t47} Jixzawh mawz miz ta ux hawj mawz faedlaemx, zoq venz dix og daeuj. Mawz miz ta doag gaj mawz ndaej mwz goh dij Sen, ndae nyeuz tai yaq miz song ta ej zoah aeu viangh bae dih dij Sen aeu hoak dih chaenxfah naeh. ⁴⁸ Dih naeh miz dij noan jin paenqdix, miz faez maej paenqdix. Sowh dij noan naeh mboq rux tai, sowh faez naeh maej daengznauq. ⁴⁹ Dij goanz gawz goj zoah aeu faez dang gow yen. ⁵⁰ Gow zawh gaenq ndae, gaj jixzawh gow mboq ndaengq, naengz rux aeu gaeng hawj dix daeuq ndaengq mux? Hoakri su gawz goj miz gow zux baenz, zoq zawh hax gaenqsu dungzhoj zux baenz."

Jinx Mboq Jinx Mboq Aeu Mijmez Hoakri

10 ¹ Yezsuz ni dih gaengnaeh, maz taeng mbanj Yaeuhdaq yaq, gvaq ka dah Yezdanq bae. Miz dij goanz maz henz dix lai taeuq, dix daj zwzndai dungzlumj zau paenqdix. ² Miz dij

^{s9:44} Mbangj bwnz mboq miz gaemz 44 naeh. Gaemz naeh daj gaemz 48 naeh dungzlumj-dungzlamj: *Dih naeh miz dij noan jin paenqdix, miz faez maej paenqdix. Sowh dij noan naeh mboq rux tai, sowh faez naeh maej daengznauq.* Gaemz naeh zawh yuq Sw Yixsaiqyaq 66:24 miz.

^{t9:46} Mbangj bwnz mboq miz gaemz 46 naeh. Gaemz naeh daj gaemz 48 naeh dungzlumj-dungzlamj: *Dih naeh miz dij noan jin paenqdix, miz faez maej paenqdix. Sowh dij noan naeh mboq rux tai, sowh faez naeh maej daengznauq.* Gaemz naeh zawh yuq Sw Yixsaiqyaq 66:24 miz.

goanz Fahliqsaiq maz ciqzaw Yezsuz, cham dix: "Hoak po'mez, po mboq aeu mijmez dix, fahlih raeuz hawj hoakzaqnaeh vah?" ³ Yezsuz yaeng: "Ndaw Sw Fahlih Moahciz yaix su hoakrawz hoak?"

⁴ Paenqdix yaeng: "Fahlih Moahciz hax jixzawh puj zaiz gawz mboq aeu mijmez dix, goanz zaiz naeh zoq laiz mbaw sw dungzyaq ux hawj mijmez dix,^u hoakzaqnaeh zoq hawj goanz puj zaiz naeh yaq mijmez dix." ⁵ Yezsuz hax: "Gaenqsu haxnyaeb gvaq, mboq biak dij Sen hoakrawz zau, Moahciz zux hoakzaqnaeh hax. ⁶ Gaj zwz nduqnduq, zwz dij Sen chauq fax daj dihndin naeh, *Dij Sen chauq dij goanz, miz puj zaiz, miz puj nyingz.*^v ⁷ *Hoakzaqnaeh puj zaiz byaeg bohme, daj mijmez zaemh yuq,* ⁸ *song goanz dungzhaeb, baenzaaq goanz doag naeh.*^w Hoakzaqnaeh po'mez mboq zawh song goanz, zawh goanz doag mbezleh. ⁹ Baenzaaqnaeh doiq po'mez rawz dij Sen goj haeuz hawj paenqdix dungzhaeb, dij goanz gawz goj mboq hoj hawj doiq naeh dungzbyaeg, po'mez goj mboq jinx haeggaj dungzbyaeg."

¹⁰ Dauh maz taeng rownz yaq, cohsaenz Yezsuz cham Yezsuz gaenq gaunduq dix hax naeh zawh hax gaeng. ¹¹ Yezsuz haxdoq paenqdix: "Puj zaiz gawz mboq aeu mez dix, yaq daeuq raep goanz mawq hoak mez, dix zoq zawh hoak loang yah mijmez nduq dix, zawh sowh loang haeuz baenzrownz yaq naengz bae naengh puj ndai naeh. ¹² Puj nyingz jixzawh gawz ni

po dix daeuq kai hawj puj ndai, dix goj suanq zawh bae naengh puj ndai."

Sowh Dij Goanz Rawz Zux

Ndaej Mwz Goh Dij Sen

¹³ Miz dij goanz zowz engliak maz henz Yezsuz, vanz dix lumh lug paenqdix, hawj dix saeh lug paenqdix vanz dij Sen gumx lug paenqdix, gaj cohsaenz dix hwt paenqdix. ¹⁴ Yezsuz leztaen yaq jih taeuq, daj cohsaenz dix hax: "Hawj engliak maz henz gux inxnaeh, laek deq paenqdix. Goh dij Sen zoq zawh aeu sowh dij goanz naeh. ¹⁵ Gux haxdoq su swhlit, jixzawh gawz mboq daj engliak inxnaeh dungzlumj zaemz goh dij Sen, gawz zoq mboq ndaej mwz goh dij Sen." ¹⁶ Yaq dix zoq umj engliak, lumh paenqdix, vanz dij Sen gumx paenqdix.

Puj Baenzaaq Mwz Goh Dij Sen Raix

¹⁷ Gau Yezsuz zaekgaj mwz dihndai naeh, miz goanz ux lenh maz, gvih bae doqnaj dix, cham dix: "Lauxswz, mawz zawh puj ndae, gux hoak gaeng zux ndaej aen mingh daengznauq naeh mux?"

¹⁸ Yezsuz daj dix hax: "Mawz baenzaaqrawz hax gux zawh puj ndae? Mizgaj dij Sen, gvaqmaz mboq miz gawz zawh puj ndae. ¹⁹ Mawz goj ruxndeq ndaw Sw *Dij Sen* dij Sen hoakzaqrawz nemz dij goanz:

"Mboq jinx luanq kaj goanz.

^u10:4 Mbawsw naeh ingj zawh laiz hawj daenh ruxndeq mboq zawh goanz nyingz naeh hoak loang, zawh goanz zaiz naeh mboq ngaiq mijmez dix.

^v10:6 Gaemz kauq naeh haeuz yuq ndaw sw daih aet Moahciz laiz naeh, minxzwh hoak Sw Zwz nduq. Gaemz kauq naeh yuq Sw Zwz nduq 1:27.

^w10:8 Gaemz naeh haeuz yuq Sw Zwz nduq 2:24.

Hoak po, hoak mez, mboq jinx naengh puj ndai.

Mboq jinx hoaklaek.

Mboq jinx moakndai daenh.

Mboq jinx jinto daenh.

Yauq zaenzungq bohme hax."^x

²⁰Dix daj Yezsuz hax: "Lauxswz, sowh naeh gux daeq zwzix maz bwnz gaj yowngh gaj biak."

²¹Yezsuz lez dix, ndaw zaw ngaiq dix, daj dix hax: "Mawz naengz cauz yowngh ux. Mawz bae kai daengzle za'hoq mawz nauq, aeu jenz baen hawj puj baenzluk. Hoakzaqnaeh gaeng ndae gaeng jihzaq mawz zoq aeu nyaengx ndaw fax, yaq mawz maz nowngz gux." ²²Goanz gaengnaeh baenzsaq taeuq, dix ruxnyinz gaemz kauq naeh yaq, najkawq, zoq ni dih naeh bae.

²³Yezsuz lez bae haenzhenz, daj cohsaenz dix hax: "Puj baenzsaq mwz goh dij Sen nanh daengz gaemz hax mboq miz nauq." ²⁴Cohsaenz dix sawz taeuq, mboq ruxndeq dix baenzzaqrawz hoakzaqnaeh hax. Yezsuz daeuq daj paenqdix hax: "Boangx lug aj, mwz goh dij Sen, nanh daengz gaemz hax mboq miz nauq. ²⁵Loahtoah ndonj ruz chaem naengz ngaih nyeuz puj baenzsaq mwz goh dij Sen." ²⁶Cohsaenz dix gajfa sawz, goanz lej daj goanz naeh hax: "Hoakzaqnaeh hax, gawz naengz ndaej jeuq ah?" ²⁷Yezsuz lez bae doq paenqdix hax: "Gaengnaeh dij goanz hoak mboq baenz, gaj dij Sen gaeng goj rux hoak, dix hoak baenz mboqyaq."

²⁸Bihdowh daj Yezsuz hax: "Mawz lez, gaenqpiu haeuz pownq viangh daengzle nauq, maz nowngz

mawz." ²⁹Yezsuz hax: "Gux haxdoq su swlhlt, gannaeh dij goanz nanghgaj gawz cholaeng gux daj kauqfaengz dij Sen pownq viangh le gaeng baihdawj inxnaeh yowngh rawz: baenzzaq le rownz aj, raehnaz aj, bohme hax aj, bihnongx aj, lug aj, le gaengnaeh toj mboq rux bowhbowh. ³⁰Zwz paenqdix naengz yuq dihndin, zoah daenh vazkuz naeh, paenqdix zoq rux ndaej lai nyeuz lai, baenzzaq ndaej rownz aj, raehnaz aj, meh aj, bihnongx aj, lug aj lai tem, yaq zoh mawq naeh naengz ndaej aen mingh daengznauq naeh. ³¹Gannaeh mbangj goanz yuq daekgoanq, mwznaj rux ndaej yuq doaklaeng, gannaeh mbangj goanz yuq doaklaeng, mwznaj rux ndaej yuq daekgoanq."

Mbaed Daih Sam Yezsuz

Hax Dix Rux Daeuq Zaeu

³²Yuq ndaw doanhloh mwz Yezluqsaxlaengx naeh, Yezsuz daeq daekgoanq daengzle; cohsaenz dix sawz taeuq, sowh puj nowngzlaeng naeh mbu. Yezsuz daeuq hawj sipngih goanz cohsaenz dix haeggaj yuq baih ux, haxdoq paenqdix gaengdix zaekgaj miz gaeng saeh. ³³Dix hax: "Gaengraeuz gannaeh mwz Yezluqsaxlaengx. Miz goanz aeu gux Lug Dij Goanz kai hawj sowh goanz gvanx puj mbud dij Sen naeh daj sowh lauxswz zau *Sw Dij Sen* naeh. Paenqdix panq gux sowxcinh, yaq aeu gux hawj sowh puj mboq zawh puj Yaeuhtaiq naeh. ³⁴Paenqdix haxzawz gux, pih naemxnaiz maz doq gux, aeu zowg faed gux, kaj gux, gaj vaenz daih sam, gux daeuq zaeu."

^x10:19 Gaemzkauq naeh haeuz yuq Sw Ni Aizjih 20:2-17.

Gawz Goj Hoj Kvej Hawj Daenh

³⁵ Song goanz lug zaiz Cizpihtaiq Yaqgowh daj Yezhanq maz doqnaj Yezsuz, daj Yezsuz hax: "Lauxswz, daengz gaenqpiu vanz mawz gaeng, ngwz mawz goj saeh piu." ³⁶ Yezsuz hax: "Hawj gux saeh su hoak gaeng mux?" ³⁷ Paenqdix hax: "Mawz miz najta dwx zwzrawz, vanz mawz hawj piu goanz ux naengh baih qensa mawz, goanz ux naengh baih qensaix mawz." ³⁸ Yezsuz hax: "Gaenqsu mboq ruxndeq gaenq gaenqsu vanz naeh zawh gaeng. Aen zung kaem gux ndut naeh, gaenqsu goj ndut baenz vah? Gaenq dij Sen saeh gux hoak diauq zauh soiq naeh naeh, gaenqsu goj gaemx ndaej vah?" ³⁹ Doiqdix yaeng: "Gaenqpiu baenz." Yezsuz hax: "Aen zung kaem gux ndut naeh, mwznaj gaenqsu hoakrawz goj ndaej ndut; gaenq dij Sen saeh gux hoak diauq zauh soiq naeh naeh, mwznaj gaenqsu hoakrawz goj ndaej gaemx. ⁴⁰ Gaj gawz naengh baih qensa gux, baih qensaix gux, mboq zawh gux hawj, zawh dij Sen aeu nyaengx hawj gawz, dix zoq aeu hawj gawz." ⁴¹ Sip goanz cohsaenz dix naeh ruxndeq suq saeh naeh yaq, zoq jihdwx Yaqgowh daj Yezhanq.

⁴² Yezsuz rongx daengz paenqdix maz, daj paenqdix hax: "Su ruxndeq puj yowngh ndai puj hoak hongz daj puj hoak saeq tuh gvanx daenh, tuh hawj daenh kvej dix. ⁴³ Gaj su laek hoakzaqnaeh. Dij goanz gux gawz zawx hoak puj dwx nyeuz daengzle, gawz zoq hoj hoakzaq lugriangz naeh kvej daengzle goanq. ⁴⁴ Gawz zawx hoak goanz

daekgoanq naeh, gawz zoq hoj hoakzaq puj koiij naeh kvej daengzle goanq. ⁴⁵ Daengz gux Lug Dij Goanz daeuj inxnaeh, goj mboq zawh daeuj hawj daenh kvej hawj, zawh daeuj kvej hawj daenh, cho jeuq aen mingh lai goanz, aeu aen mingh hoakri bae lwh."

Yezsuz Ya Goanz Ta'mbud Ux Ndae

⁴⁶ Paenqdix mwz taeng Yezliqgoz chaenh, gau Yezsuz daj cohsaenz dix daj yaengh boangx goanz daeq ndaw Yezliqgoz chaenh og daeuj naeh, miz goanz ta'mbud dexkaeuj ux, yuq haenz loh naengh. Goanz naeh rongx hoak Bazdixmaix, dix zawh lug zaiz Dixmaix. ⁴⁷ Dix cenq ruxndeq zawh Yezsuz, goanz daeq longq Nazsahlowh maz naeh, zoq rongx: "Yezsuz, luglan Daqvaeq aj, zawchaej gux mah!"^y ⁴⁸ Miz lai goanz taeuq hwt dix, mboq hawj dix hax kauq, gaj dix gajfa rongx chungndae, dix rongx: "Luglan Daqvaeq aj, zawchaej gux mah!" ⁴⁹ Yezsuz zoq zow, dix hax: "Rongx dix maz inxnaeh." Paenqdix zoq rongx goanz ta'mbud naeh, daj dix hax: "Awh! Laek mbu, dwnq maz, dix rongx mawz yah!" ⁵⁰ Goanz ta'mbud naeh aeu gongzsowj riz dix viangh, yoanghyangh dwnq maz, daeq bae doqnaj Yezsuz. ⁵¹ Yezsuz daj dix hax: "Mawz daz hawj gux saeh mawz hoak gaeng mux?" Goanz ta'mbud naeh daj Yezsuz hax: "Lauxswz, hawj ta gux rux leztaen!" ⁵² Yezsuz hax: "Bae ndeh, mawz sinq gux, ta mawz ndae eh!" Goanz ta'mbud naeh cenq rux leztaen, yaq nowngz Yezsuz bae.

^y10:47 Daqvaeq zawh zwzpujjeq laux hongz Yixsowhleh ux.

Yezsuz Kviq Dij Loix Mwz Yezluqsaxlaengx

11 ¹Paenqdix zaekgaj mwz taeng Yezluqsaxlaengx, mwz taeng longq Boahfahqih daj longq Boahdaqnih, yuq ndaw Bo Maeghit naeh. Yezsuz nemz song goanz cohsaenz dix, ²daj paenqdix hax: "Gaenqsu mwz longq doiqfaeg naeh. Doiq su mwz taeng gaurawz, su zoq leztaen miz do dij loixreauh ux, gawz goj naengz mboq sanz kviq, lamh yuq dih gaengnaeh. Su hih dix, yaq zung dix daeuj inxnaeh. ³Jixzawh miz dij goanz cham su baenzaqrawz hoakzaqnaeh hoak, su zoq haxdoq daenh, Zaeuj yungq zoah dix. Ixux cenq daeuq aeu maz hawj yaj." ⁴Doiq naeh zoq bae, leztaen miz do dij loixreauh ux lamh baegdu haenz ka loh ux. Paenqdix zoq hih zowg dij loix. ⁵Sowh dij goanz in yuq dihnaeh zoq cham doiq dix: "Gaenqsu baenzaqrawz hih zowg dij loix?" ⁶Cohsaenz Yezsuz hoakzaq gaemz Yezsuz yaix hax naeh yaeng paenqdix. Paenqdix zoq hawj doiqdux zung dij loix maz. ⁷Cohsaenz Yezsuz zung dij loix maz dih Yezsuz naeh, aeu sowjriz hoakri paenqdix gumq mwz nowlaeng dij loix, Yezsuz zoq kviq mwz now dix. ⁸Daenh doiq dix daj doiq laux hongz dungzlumj, zoq zawh miz goanz lai taeuq aeu sowjriz paenqdix maz baiz ka loh, naengz miz dij goanz bae haenz naz taemj ngah maex maz baiz ka loh. ⁹Puj daeq daekgoanq daj puj nowngzlaeng gaj goanz gaj biangz dij Sen rongx:

"Hoahsanxnah!"^z

Ngwz dij Sen gumx goanz dij Sen nemz daeuj naeh!^a

¹⁰Ngwz dij Sen gumx goh zaekgaj daeuj naeh.

Goh naeh zawh goh puj jeq raeuz, goh laux hongz Daqvaeq.

Dih sung nyeuz daengzle naeh goj hoj lownx:

'Hoahsanxnah!'"

¹¹Yezsuz mwz taeng Yezluqsaxlaengx, ndonj mwz rownz dij Sen, dih rawz goj lez yaq, fax zaekgaj ndaem, dix zoq daj sipngih goanz cohsaenz dix daeq Yezluqsaxlaengx bae longq Boahdaqnih.

Yezsuz Mang Go Maex Maeg'vowh Ux

¹²Vaenz laeng, paenqdix daeq ndaw longq Boahdaqnih mwz, Yezsuz dongxyaeg. ¹³Naengz miz hongj ux, dix leztaen go maex maeg'vowh ux, go maeg naeh miz mbaw, zoq daeq bae doq go maeg naeh, lez go maeg naeh miz mboq miz maeg. Zwz naeh mboq zawh zwz miz maeg'vowh, dix bae taeng dih go maeg naeh, mizgaj mbawmaex, gvaqmaz gaeng goj cha mboq mex. ¹⁴Yezsuz daj go maexmaeg naeh hax: "Gvaq vaenz naeh mwz, mboq rux miz dij goanz jin maeg mawz yaj!" Cohsaenz dix goj ruxnyinz gaemz kauq dix naeh.

^z11:9 "Hoahsanxnah" zawh kauq Cizboahlaiz, zoq zawh hax: "Vanz mawz jeuq piu." Jeh Yezsuz naeh puj Yaeuhtaiq aeu gaemz naeh biangz dij Sen.

^a11:9 Gaemz kauq naeh haeuz yuq Sw Lownx 118:25-26.

Yeysuz Daem Gaeng Mboq

Ndae Ni Rownz Dij Sen

¹⁵ Paenqdix maz taeng Yezluqsaxlaengx, Yeysuz ndonj mwz rownz dij Sen, zoq daem sowh puj yuq ndaw dix swx koang'hoq kai koang'hoq naeh ni nauq, ngex aen zongz sowh puj saeh daenh lwh ngaenzjenz naeh laemx, ngex aen daengq sowh puj kai noagbiadhaeb naeh laemx. ¹⁶ Mboq hawj gawz tw za'hoq gvaq rownz dij Sen. ¹⁷ Dix zau daenh hax: "Ndaw *Sw Dij Sen* hoakzaqnaeh laiz: Dij Sen hax: rownz gux zawh dih aeu hawj dij goanz dawj fax daj gux hax kauq naeh,^b gaj su aeu dih naeh hoak daj dih puj laek ndowj dungzlumj." ¹⁸ Boangx naeh biak kauq Yeysuz yaq menq sawz menq zaemz. Hoakzaqnaeh sowh goanz gvanx puj mbud dij Sen naeh daj lauxswz zau *Sw Dij Sen* zoq mbu Yeysuz, zoq nwh hoakrawz kaj dix. ¹⁹ Zang'haemh, Yeysuz daj cohsaenz dix daeq ndaw Yezluqsaxlaengx og bae.

Taen Go Maeg Yeysuz Mang Naeh Choj Nauq

²⁰ Nawlaeng zaeux, paenqdix gvaq zoah go maeg'vowh gaengnaeh, leztaen go maeg'vowh gaeng naeh daengz go daengz laeg choj nauq. ²¹ Bihdowh nwh ndaej gaemz kauq Yeysuz hax naeh, dix zoq daj Yeysuz hax: "Lauxswz, mawz lez, go maeg'vowh mawz mang naeh haeuz choj nauq yah." ²² Yeysuz yaeng paenqdix: "Gaenqsu mizzaw sinq dij Sen zux baenz. ²³ Gux haxdoq su swhlit, mboqgvax

gawz daj aen bo naeh hax: Ni inxnaeh, bae ndaw hajj, nanghgaj goanz hax naeh mboq miz songzaw, nanghgaj mizzaw sinq dij Sen rux hawj gaeng dix vanz naeh baenzzaeh, dij Sen zoq saeh dix hoak mboqyaq. ²⁴ Baenzzaqnaeh, gux haxdoq su, su vanz dij Sen gaeng, sinq dix rux hawj su, dix zoq hawj su mboqyaq. ²⁵ Gaenqsu daj dij Sen hax kauq gaurawz, jixzawh miz gawz hoak loang su, su hoj yangq dix, hoakzaqnaeh dez ndaw fax su goj zux yangq gaeng gaenqsu hoak loang naeh." ^{26 c}

Jinj Yeysuz Pinh Gaeng Hoak Sowh Saeh Naeh

²⁷ Paenqdix daeuq maz taeng Yezluqsaxlaengx. Gau Yeysuz yuq ndaw rownz dij Sen daeq naeh, sowh goanz gvanx puj mbud dij Sen naeh, sowh lauxswz zau *Sw Dij Sen* naeh daj sowh puj saeq gvanx dij goanz Yaeuhtaiq naeh daeq maz henz Yeysuz, ²⁸ cham Yeysuz: "Mawz pinh qenhliq gaeng hoak sowh saeh naeh mux? Zawh gawz aeu sowh qenhliq naeh hawj mawz?" ²⁹ Yeysuz daj paenqdix hax: "Gux cham su gaemz ux, su yaeng gux! Jixzawh su yaeng gux, gux zoq haxdoq su gux pinh qenhliq gaeng hoak sowh saeh naeh. ³⁰ Su ruxndeq Yezhanq goanz saeh daenh hoak diauq zauh soiq naeh. Sowh gaeng zauh soiq dix hoak naeh zawh tw'zaw dij Sen hoak? Raj zawh tw'zaw dij goanz hoak? Yezhanq zawh puj zawxkauq dij Sen zaeh mbaeuq? Su yaeng gux!" ³¹ Paenqdix zoq dungzcham: "Jixzawh gaenqraeuz hax: 'Zawh tw'zaw dij Sen hoak, dix toj rux hoakzaqnaeh hax raeuz mboqyaq,' dix hax:

^b11:17 Gaemz kauq naeh haeuz yuq *Sw Yixsaiqyaq* 56:7.

^c11:26 Mbangj bwnz miz gaemz naeh: *Jixzawh su mboq yang gaeng puj ndai hoak loang naeh, dez ndaw fax su goj mboq rux yang gaeng gaenqsu hoak loang naeh.*

‘Haenx, gaenqsu baenzrawz naengz mboq sinq dix mah?’³² Jixzawh gaenqraeuz hax: ‘Sowh gaenq zauh soiq Yezhanq hoak naeh zawh tw'zaw dij goanz hoak,’ gaenqraeuz mbu goanzlai rux dix gaenqraeuz, saeuh gaenqraeuz. Unj goanzlai gawz goj sinq Yezhanq zawh puj zawxkauq dij Sen zaeh.”³³ Yaq paenqdix zoq yaeng Yezsuz: "Gaenqpiu mboq ruxndeq." Yezsuz hax: "Haenx, gux goj mboq haxdoq su gux pinh qenhliq gaeng hoak sowh saeh naeh."

Aen Bixliq Puj Su Oax Maegkaeu'it Naeh

12¹ Yezsuz laemh aen bixliq ux hawj sowh puj gaunduc maz jinj dix naeh biak, dix hax: "Miz goanz ux, ndaem oax maegkaeu'it ux, dix dingz daengz oax maegkaeu'it dix nauq, dix kut luh ux, luh naeh zawh aeu nyanx maegkaeu'it hoak laeuj, yuq ndaw sown naeh goj daengj aen rownz ux aeu dawz sown. Yaq dix zoq aeu oax sown naeh su hawj daenh, hoakri dix zoq bae goh ndai.² Taeng zwz baenz caeu, dix zoq yaix goanz puj koj ux maz daj sowh puj su oax maegkaeu'it dix naeh aeu gaenq sownq dix hoj ndaej naeh.³ Gaj sowh puj su oax maegkaeu'it dix naeh dup goanz puj koj dix yaix maz naeh, hawj goanz puj koj dix naeh mungzbyaeuq dauh bae.⁴ Zaeuj oax maegkaeu'it naeh daeuq yaix goanz puj koj ux maz. Mbaed naeh, sowh puj su oax maegkaeu'it naeh dup to goanz puj koj naeh, yaq paenqdix naengz hawj goanz puj koj naeh laizlom taeuq.⁵ Zaeuj oax maegkaeu'it naeh daeuq yaix

goanz puj koj ux maz, sowh puj su oax maegkaeu'it dix naeh kaj goanz puj koj dix. Doaklaeng zaeuj oax maegkaeu'it naeh daeuq yaix yaengh boangx puj koj dix maz, gaj boangx puj koj dix, mbangj goanz zoah paenqdix kaj, mbangj goanz zoah paenqdix dup.⁶ Zaeuj oax maegkaeu'it naeh naengz miz goanz ux, dix zawh goanz lug zaiz dix. Dix ngaiq goanz lug zaiz dix taeuq. Zaeuj oax maegkaeu'it naeh hax: ‘Paenqdix toj zaenzungq lug zaiz gux mboqyaq.’⁷ Gaj sowh puj su oax maegkaeu'it naeh hoakzaqnaeh dungzlaemh: ‘Mwznaj dez dix aeu oax sown naeh hawj dix. Jixzawh gaenqraeuz kaj dix, oax sown naeh zoq baenz oax raeuz.’⁸ Yaq paenqdix zoq bae gaep dix, kaj dix, aeu dix viangh bae baihnog oax sown.⁹ Hoakzaqnaeh, su ruxndeq zaeuj oax maegkaeu'it naeh hoakzaqrawz hoak vah? Dix daeuj kaj sowh puj su oax maegkaeu'it dix naeh mboqyaq, yaq daeuq aeu oax maegkaeu'it dix su hawj puj ndai.^{10–11} Ndaw *Sw Dij Sen* hoakzaqnaeh hax:

“Kvaix tin puj hoak zangh aeu viangh naeh,

haeuz baenz tin'dinsaeu kvaix zungqyauq nyeuz daengzle naeh.

Gaenqnaeh zawh Zaeuj hoak,

gaenqnaeh hawj raeuz sawz taeuq.”^d

Le gaemz naeh su mboq sanz ndaej doag mah?"

¹² Paenqdix ruxndeq aen bixliq naeh zawh hax paenqdix, paenqdix zawx gaep Yezsuz, gaj paenqdix

^d12:10-11 Le gaemz naeh haeuz yuq ndaw *Sw Lownx* 118:22-23. Gaemz naeh, tin zawh hax Yezsuz, puj hoak zangh zawh hax sowh goanz gvanx puj mbud dij Sen naeh, sowh lauxcwz zau *Sw Dij Sen* naeh daj sowh puj saeq gvanx dij goanz Yaeuhtaiq naeh.

mbu puj ndai, baenzzaqnaeh paenqdix zoq ni Yezsuz bae.

Cham Yezsuz Hoj Mboq Hoj Kae Coiq

¹³ Doaklaeng, paenqdix nemz jij goanz Fahliqsaiq ux daj jij goanz baih laux hongz Cizlih ux maz dih Yezsuz naeh, daz aeu kauq dix hoak saeh. ¹⁴ Paenqdix maz taeng, zoq daj Yezsuz hax: "Lauxswz, piu ruxndeq mawz zawh puj sw, mawz doiq gawz goj dungzlumj, mawz mboq lez najta gawz, dij Sen hoakrawz hax, mawz zoq hoakrawz koanx dwk daenh. Gaenqpiu cham mawz hawj mboq hawj kae coiq hawj laux hongz Kaixsax?^e Gaenqpiu hoj mboq hoj kae coiq mux?" ¹⁵ Yezsuz ruxndeq paenqdix baeg daj zaw mboq dungzlumj, zoq daj paenqdix hax: "Gaenqsu baenzzaqrawz ciqzaw gux mux? Aeu mbaw downnah jenzngaenz ux hawj gux lez." ¹⁶ Paenqdix zoq aeu hawj dix. Yezsuz cham paenqdix: "Tuh naeh zawh gawz? Zawh minxzw hawz?" Paenqdix yaeng: "Zawh Kaixsax." ¹⁷ Yezsuz hax: "Zawh gaenq Kaixsax zoq hoj aeu hawj Kaixsax, zawh gaenq dij Sen zoq hoj aeu hawj dij Sen." Paenqdix mboq naemz Yezsuzrux yaeng baenz naeh, paenqdix sawz taeuq.

Dij Goanz Tai Yaq Rux Mboq Rux Daeuq Zaeu?

¹⁸ Dij goanz baih Saxduzgaiz mboq sanz sinq dij goanz tai yaq rux daeuq zaeu.^f Paenqdix maz dih

Yezsuz naeh, cham Yezsuz: ¹⁹ "Lauxswz, yuq ndaw *Sw Dij Sen* Moahciz hoakzaqnaeh laiz: Jixzawh gawz tai yaq, low gaj mijmez dix, mboq miz lug, nongx zaiz goanz tai naeh zoq hoj raep bihnganz dix hoak mez, saeh goz dix suplaeng.^g ²⁰ Venj naeh, rownz ux miz jiat bihnongx zaiz, lug zaiz to raep goanz mijmez ux, gaenqdix tai yaq, mboq miz lug. ²¹ Goanz daih ngih naeh daeuq raep bihnganz dix hoak mijmez, goj naengz mboq miz lug zoq tai. Goanz daih sam goj zawh venj naeh. ²² Daengz jiat goanz mboq miz lug, doaklaeng goanz nyingz gaengnaeh goj tai. ²³ Jiat goanz paenqdix gawz goj ndaej raep goanz nyingz naeh hoak mijmez. Haenx, vaenz dij Sen hawj dij goanz daeuq zaeu naeh, goanz nyingz naeh zawh hoak mijmez gawz mawj?" ²⁴ Yezsuz hax: "Gaenqsu loang yah. Gaenqsu baenzzaqrawz loang mah? Zawh gaenqsu mboq ruxndeq ndaw *Sw Dij Sen* hoakrawz hax, mboq ruxndeq dij Sen riangz baenzzaqrawz. ²⁵ Dij goanz tai yaq daeuq zaeu, puj zaiz mboq raep, puj nyingz mboq kai, hoakzaq bin dij Sen ndaw fax naeh. ²⁶ Hax taeng mbaed saeh dij goanz tai yaq daeuq zaeu naeh, ndaw sw Moahciz miz, gaenqsu mboq sanz ndaej doag maj? Zwz Moahciz leztaen bungzmaex miz faez naeh, dij Sen daj Moahciz hoakzaqnaeh hax: Gux zawh dij Sen Yaqboahlazhanq, dij Sen Yitsaeg, dij Sen Yaqgowh."^h ²⁷ Yaq Yezsuz daeuq hax: "Dij Sen

^e12:14 Kaixsax zawh laux hongz Loahmax gvanx lai goh naeh.

^f12:18 *Baih Saxduzgaiz* zawh baih puj Yaeuhtaiq ux. *Sw Dij Sen*, paenqdix sinq gaj haj bwnz sw Moahciz laiz naeh. Paenqdix mboq sinq miz bin'dijsen, miz minghkoan, dij goanz tai yaq rux daeuq zaeu.

^g12:19 Gaemz kauq naeh haeuz yauq ndaw Sw Fahlih Daih Ngih Naeh 25:5.

^h12:26 Gaemz kauq naeh haeuz yuq Sw Ni Aizjih 3:6.

mboq zawn dij Sen puj tai, dix zawn dij Sen puj zaeu.
Gaenqsu loangndaek yah!"

Fahlh Dij Sen Gaemz Rawz Zungqyauq Nyeuz

²⁸ Miz goanz lauxswz zau *Sw Dij Sen* ux ruxnyinz paenqdix dungzjinj, dix zoahdowh Yezsuz yaeng ndaej hoj, zoq maz cham Yezsuz: "Fahlh dij Sen gaemz rawz zungqyauq nyeuz?" ²⁹ Yezsuz yaeng: "Gaemz naeh zungqyauq nyeuz daengzle:

"Dij goanz Yixsowhleah aj, su caqsiq biak!

Mizgaj Zaeuj dij Sen raeuz zawn dij Sen.

³⁰ Mawz aeu daengz zaw, daengz mingh, daengz aen og, daengz doakriangz, ngaiq dij Sen laux zaeuj mawz naeh.ⁱ

³¹ "Yaq taeng gaemz naeh:

"Nwh puj hoakri daj nwh hoakri dungzlumj.^j

Mboq miz saek gaemz zungqyauq nyeuz song gaemz naeh."

³² Lauxswz gaengnaeh daj Yezsuz hax: "Lauxswz, zawn zaeh lox, mawz hax ndaej hoj taeuq, Mizgaj Zaeuj zawn dij Sen, mboq miz dij sen tem.^k

³³ Gaenqraeuz aeu daengz zaw, daengz aen gvai, daengz doakriangz ngaiq dij Sen, nwh daenh daj nwh hoakri dungzlumj, hoakzaqnaeh ndae nyeuz sown

gaenq aeu mbud dij Sen naeh lai." ³⁴ Yezsuz leztaen dix yaeng miz aen gvai taeuq, zoq daj dix hax: "Mawz liq goh dij Sen mboq gvae yah." Daeq mbaed naeh maz, mboq miz gawz ganz maz chamraix Yezsuz.

Daqvaeq Rongx Jizduz Hoak Zaeuj

³⁵ Yezsuz yuq rownz dij Sen zau daenh, dix hax: "Sowh lauxswz zau *Sw Dij Sen* naeh hax Jizduz zawn luglan Daqvaeq. ³⁶ Gaj Minghkoan dij Sen daeuj ndaw ndang Daqvaeq, Daqvaeq hoakri dix haeggaj rongx Jizduz hoak Zaeuj. Gaemz dix rongx Jizduz hoak Zaeuj naeh yuq inxnaeh:

"Dij Sen daj Zaeuj gux hax:

"Mawz naengh baih qensa gux,^l

taj gux aeu sown puj daj mawz dangqbaih naeh nyaengx bae dej din mawz."^m

³⁷ Yaq Yezsuz cham paenqdix: "Taeng'hax Daqvaeq rongx Jizduz hoak Zaeuj, haenx, su ciq hax, Jizduz hoakrawz ej daeuq zawn luglan Daqvaeq?" Boangx naeh ngaiq biak dix.

Yezsuz Yaix Daenh Hem

Sowh Lauxswz Zau Sw Dij Sen Naeh

³⁸ Gau Yezsuz zau daenh naeh, dix hax: "Gaenqsu hem sown lauxswz zau *Sw Dij Sen*

ⁱ12:30 Gaemz kauq naeh haeuz yuq *Sw Fahlh Daih Ngih* 6:4-5.

^j12:31 Gaemz kauq naeh haeuz yuq *Sw Liqvaeq* 19:18, 34.

^k12:32 Gaemz kauq naeh haeuz yuq *Sw Fahlh Daih Ngih* 4:35.

^l12:36 *Naengh baih qensa gux* zawn hax: "hawj mawz najta dwx nyeuz daengzle."

^m12:36 Gaemz kauq naeh haeuz yuq *Sw Lownx* 110:1.

naeh, paenqdix ngaiq nungh sowj riz daeq bae daeq dauh,ⁿ ngaiq hawj daenh yuq zang hw goak dwk paenqdix. ³⁹Ngaiq yuq rownzndawcowq naengh aen sung nyeuz daengzle naeh, daj daenh zaemh jin byaeuzngaiz ngaiq naengh pyaeg zongz. ⁴⁰Paenqdix hoak doi daj dij Sen hax kauq ndowj yaengh ndowj. Paenqdix jinto sowh yah po haeuz tai yaq naeh, aeu za'hoq paenqdix nauq. Sowh goanz naeh dij Sen haeggaj rux fah paenqdix mboqyaq, zoah naek mboqyaq."

Yah Po Haeuz Tai Yaq Luk Taeuq Naeh Aeu Hawj Gajrawz

⁴¹Yeysuz naengh doiqfaeg dih daenh aeu ngaenzjenz nyaengx hawj dij Sen naeh, lez daenh hoakrawz aeu jenz nyaengx bae ndaw dix. Sowh puj baenzsaq naeh aeu jenz nyaengx bae lai taeuq. ⁴²Miz yah ux po dix haeuz tai yaq, luk taeuq naeh, dix aeu nyaengx bae song mbaw jenzdongz ix, zoq zawh lai daj mbaw jenzdongz dwx ux dungzlumj. ⁴³Yeysuz rongx cohsaenz dix maz, daj paenqdix hax: "Gux haxdoq su swhlit, yah po haeuz tai yaq luk taeuq naeh gaenq jenz dix aeu hawj naeh, hawj lai nyeuz daengzle. ⁴⁴Unj, puj ndai gawz goj aeu gaenq low paenqdix hawj, gaj yah naeh hoakri dix naengz mboq doh, dix miz gajrawz zoq aeu hawj gajrawz nauq."

Hoakzaqrawz Ruxndeq Mwznaj Baenzzaqrawz

13 ¹Gau Yeysuz daeq rownz dij Sen og daeuj naeh, cohsaenz dix miz goanz ux daj dix hax: "Lauxswz, mawz lez rownz dij Sen; tin dix

yawz gaiq eh! Rownz dix yawz gaiq eh!" ²Yeysuz daj dix hax: "Gux haxdoq mawz, aen rownz dij Sen inxnaeh, mwznaj mboq miz saek kvaix tin yuq now kvaix ndai, gaj kvaix gaj zoah lid nauq."

³Paenqdix mwz taeng Bo Maeghit naeh yaq, Yeysuz naengh ueqnaj bae doq rownz dij Sen. Gau naeh mboq miz puj ndai, Bihdowh, Yaqgowh, Yezhanq, Anzdowhle le goanz naeh cham dix: ⁴"Vanz mawz haxdoq piu, zwzrawz miz sowh saeh naeh? Sowh saeh naeh zaekgaj miz zwzrawz, log gaeng hawj gaenqpiu ruxndeq?" ⁵Yeysuz zoq haxdoq paenqdix: "Gaenqsu yauq caqsiq hem, laek hawj daenh yai zoah. ⁶Mwznaj rux miz dij goanz daeuj yai daenh hax paenqdix zawh Jizduz, yai daenh ndaej lai taeuq. ⁷Gaenqsu ruxnyinz baih rawz daj baih rawz dungzsaeuh gojndae, ruxnyinz daenh hax baih rawz daj baih rawz dungzsaeuh gojndae, su goj laek mbu, sowh naeh cauz mboq rux ndaej, gaj naengz mboq zawh vaenzmowd. ⁸Baih lej mwz saeuh baih, goh lej mwz saeuh goh, dih jenjyaeg miz lai, dih diqzaenq miz lai. Sowh naeh daj puj nyingz taeng zwz ced dongx zux hem chaej naeh dungzlumj."

⁹"Gaj su yauq caqsiq hem! Miz dij goanz aeu su mwz fahtinh, gaenqsu yuq rownzndawcowq zoah daenh aeu zowg faed. Su nowngz gux, su ndaej mwz doqnaj saeq dwx daj laux hongz, aeu gaenq gux laemh dwk paenqdix. ¹⁰Naengz mboq taeng vaenzmowd, miz dij goanz aeu kauqfaengz dij Sen laemh dwk daenh, dawj fax puj gaeng goj ndaej ruxnyinz kauqfaengz dij Sen mboqyaq. ¹¹Daenh goangz su mwz hawj puj saeq zwzrawz, gaenqsu

ⁿ12:38 Jeh Yeysuz naeh, nungh sowj riz zawh hax najta dwx taeuq.

laek pyej daz hoakrawz hax. Taeng zwz naeh, mboq zawh su hax kauq, zawh Minghkoan dij Sen hax. Minghkoan dij Sen hawj su hax gaeng, su zoq hax gaeng. ¹² Bihmongx haeggaj rux aeu bihnongx bae hawj daenh kaj, boh rux haeggaj aeu lug bae hawj daenh kaj. Lug dix bohme, hawj paenqdix tai. ¹³ Gaenqsu cho zwz gux, zoah daenh hwnq, gaj gawz gaemx taeng mowd, gawz zoq ndaej jeuq."

Ndauj Miz Nanq Dwax Naeh

¹⁴ Yezsuz daeuq hax: "Mwznaj rux miz gaenq ndoagndaeg, gaenq hawj daengzle lown naeh in yuq dih mboq hoj in naeh, gaenqsu leztaen zwzrawz, gawz yuq mbanj Yaeuhdaq gawz zoq lenh gowx mwz ndaw bo. Gawz doag inxnaeh zoq caqsiq nwh le gaemz naeh zawh hax gaeng. ¹⁵ Puj yuq haenz rownz zoq laek dauh mwz rownz, laek ndonj mwz ndaw rownz aeu gaeng.^o ¹⁶ Puj yuq ndaw naz goj laek dauh mwz aeu ndangnungh. ¹⁷ Ndauj gaengnaeh, puj nyingz sowh puj bazlug naeh daj sowh puj lug eng naengz jin zuj naeh zoq nanh yah! ^{18–19} Ndauj gaengnaeh toj rux miz saeh dwx, miz nanq dwx, daeq dij Sen chauq fax daj dihndin maz taeng gannaeh mboq sanz miz saek mbaed baenzaqnaeh, mwznaj goj mboq rux miz saek mbaed baenzaqnaeh. Baenzaqnaeh, gaenqsu vanz dij Sen, laek hawj sowh saeh naeh yuq zwzgoangj. ²⁰ Jixzawh dij Sen mboq hawj ndauj miz nanq dwx naeh cauz ixux, zoq mboq miz gawz naengz low. Gaj Zaeuj cho dij goanz dix, cho sowh dij goanz dix lowg naeh, dix rux hawj ndauj gaengnaeh cauz ixux. ²¹ Taeng zwz naeh, jixzawh miz dij goanz daj

su hax: Su lez, Jizduz yuq inxnaeh! Su lez, Jizduz yuq dih naeh! Gaenqsu laek sinq! ²² Mwznaj rux miz Jizduz zaj, goj rux miz puj zawxkauq dij Sen goanz zaj gaenqnaeh. Paenqdix hoak sowh saeh mboq sanz taen naeh, hoak sowh saeh naeh hawj daenh sinq hoakri zawh Jizduz. Jixzawh paenqdix rux, daengz sowh dij goanz dij Sen lowg hoak dij goanz dix naeh paenqdix naengz yai. ²³ Baenzaqnaeh, gaenqsu yauq caqsiq hem! Gux haeuz yowngh rawz goj haxdoq su daekgoanq."

Lug Dij Goanz Kviq Pajfax Loangz Daeuj

²⁴ "Ndauj gaengnaeh, doaklaeng ndauj miz nanq dwx naeh, tang'vaenz zoq byenq ndaem, aen hai goj mboq rungh. ²⁵ Ndaundi q doak daeq ndaw fax daeuj, sowh yuq ndaw fax naeh fenz nauq. ²⁶ Taeng zwz naeh, paenqdix zoq leztaen Lug Dij Goanz miz doakriangz lai, miz najta taeuq, kviq pajfax loangz daeuj. ²⁷ Dix nemz bin dij Sen daeuj, hawj sowh dij goanz dij Sen lowg naeh, gawz yuq dihndin gojndae, yuq ndaw fax gojndae, yuq rawz goj zowz maz zaemh yuq. ²⁸ Aeu maex maeg'vowh maz hax, gaenqsu leztaen ngah dix sowd nyit zwzrawz, gaenqsu zoq ruxndeq gvaq zwzgoangj zaekgaj taeng zwz'unq yah, su hoj ruxndeq sowh dauqlix naeh. ²⁹ Mwznaj gaenqsu leztaen sowh nanq dwx log hawj su taen naeh baenz zwzrawz, gaenqsu zoq ruxndeq Lug Dij Goanz liq mboq gvae, daeuj taeng baegdu yah. ³⁰ Gux haxdoq su swhlit, zoh naeh naengz mboq gvaq, gaj yowngh gaj rux baenz mboqyaq. ³¹ Fax daj dihndin rux mboq miz, gaj kauq gux miz daengznauq."

^o13:15 Inxnaeh mbaednduq zawh hax: *Puj yuq nyiangzrownz zoq laek dauh mwz rownz.*

Jinh Ixux!

³² "Gaj gux daeuq daeuj vaenz rawz, gau rawz, mboq miz gawz ruxndeq, bin dij Sen ndaw fax goj mboq ruxndeq, daengz gux zawh Lug, gux goj mboq ruxndeq, mizgaj Dez ndaw fax ruxndeq.

³³ Gaenqsu yauq caqsiq hem, naeuz jinh ux, gaenqsu mboq ruxndeq vaenz gaengnaeh zawh zwz rawz.

³⁴ Gaenq naeh zoq daj goanz ux zaekgaj og nog bae gvae taeuq dungzlumj. Dix zoq hawj puj kojij dix saeh dix gvanx, yaix puj kojij dix gawz hoj hoak gaeng zoq hoak gaeng, yaq nemz goanz dawz du naeh, naeuz jinh ux. ³⁵ Baenzaqnaeh, gaenqsu yauq caqsiq hem, jinh ixux, gaenqsu mboq ruxndeq zaeujrownz zwzrawz daeuj, zang'haemh daeuj goj mboq ndeq, byonghhwnz daeuj goj mboq ndeq, sowh gau dij gaeq kaen naeh daeuj goj mboq ndeq, rux zangnaw daeuj goj mboq ndeq. ³⁶ Jixmboqzawh dix yoanghyangh dauh daeuj gaurawz, zoq leztaen gaenqsu noanzlaep ejloah. ³⁷ Gaemz naeh gux daj su hax, goj daj daengzle hax, Gaenqsu yauq caqsiq hem, jinh ixux!"

Nwh Hoakrawz Kaj Yeysuz

14¹⁻² Naengz miz song vaenz tem, zoq taeng Jeng Gvaq daj Jeng Mboq Miz Fahfaenx naeh.^p Sowh goanz gvanx puj mbud dij Sen naeh daj sowh lauxswz zau *Sw Dij Sen* naeh nwh kaj Yeysuz. Gaj Paenqdix hax: "Le vaenz jin'jeng naeh

hoak mboq baenz, yaj daengzle luanq mbukmbuk." Baenzaqnaeh paenqdix daz hoakgoix jenj Yeysuz, yaq kaj dix.

Miz Goanz Nyingz Ux Aeu

Gaenq Hom Yiat To Yeysuz

³ Zwz Yeysuz yuq longq Boahdaqnih, yuq rownz Cizmaenh goanz mbaednduq baenznux naeh. Gau yuq rownz goanz naeh jinkaeuj naeh, miz goanz nyingz ux gaem aen pinh viq ux maz, ndaw dix laep sowh *nahdah* biangz taeuq, hom taeuq naeh. Goanz nyingz naeh duaiq aen pinh dix vaih, yaq aeu daengzle gaenq hom dix zoaj mwz to Yeysuz. ⁴ Miz jij goanz ux jih taeuq, goanz lej daj goanz hax: "Dix hoakzaqnaeh hoak sezndai gvaq loh! ⁵ Gaenqnaeh aeu kai ndaej yaengh sam baeg lai downnah ngah. Gangmaz aeu kai yaq aeu sowh jenz naeh saeh puj luk." Paenqdix zoq hwt goanz nyingz naeh. ⁶ Gaj Yeysuz hax: "Laek hax dix! Baenzaqrawz hawj dix hoakraix mux? Dix saeh gux hoak diauq ux ndae taeuq. ⁷ Gaenqsu zwzrawz daj puj baenzluk zaemh yuq, nanghgaj su venq, su zwzrawz saeh paenqdix goj ndaej, gaj gaenqsu mboq zwzrawz ndaej daj gux zaemh yuq. ⁸ Dix haeuz caqsiq hoak taeuq eh, dix aeu sowh gaenq hom naeh zoaj ndang gux,^q taj mwznaj aeu ndang gux moak. ⁹ Gux haxdoq su swhlit, kauqfaengz dij Sen leuz mwz taeng rawz gojndae, diauq dix saeh gux hoak naeh toj leuz mwz taeng rawz, hoakzaqnaeh nyen dix."

P14:1-2 *Jeng Gvaq* daj *Jeng Mboq Miz Fahfaenx Naeh* zawh puj Yaeuhtaiq bi ux jin gongghw ux hoak gaenq nyen zwzpujjeq dij Sen zowz paenqdix ni ndaw Aizjih. Gaj laux hongz Aizjih mboq hawj paenqdix ni, dij Sen nemz bin dix ux daeuj kaj lug zaiz to sowh dij goanz yuq ndaw Aizjih naeh. Gaj jixzawh baegdu rownz gawz miz lowd dij mbej ix, bin dij Sen zoq gvaq bae, mboq mwz ndaw rownz, kaj lug zaiz to. Hoakzaqnaeh zoq rongx hoak "*Jeng Gvaq*."

q14:8 Puj Yaeuhtaiq aeu sowh gaenq hom naeh daz puj tai, daj puj Daez saeh puj tai aebdah dungzlumj.

Yaeuhdaq Daz Aeu Yezsuz Hawj Daenh

¹⁰ Yaeuhdaq goanz ndaw Zazyoah naeh, dix mwz dih sowh goanz gvanx puj mbud dij Sen naeh, daz aeu Yezsuz hawj paenqdix. Laemh goanz Yaeuhdaq naeh dix zawh sipngih goanz dij goanz zawxkauq Yezsuz naeh goanz ux. ¹¹ Sowh puj gvanx puj mbud dij Sen naeh ruxnyinz Yaeuhdaq hoakzaqnaeh hax zoq faengz taeuq, venq aeu ngaenz hawj dix. Yaq Yaeuhdaq zoq nwh hoakrawz aeu Yezsuz hawj paenqdix.

Mwngx Byaeuz Doaklaeng Naeh

¹² Jeng Mboq Miz Fahfaenx vaenz nduq dix naeh, zoq zawh vaenz Jeng Gvaq kaj dij mbej naeh, cohsaenz Yezsuz cham Yezsuz: "Mawz hawj piu mwz rawz saeh mawz hoak byaeuz Jeng oah?" ¹³ Yezsuz zoq nemz song goanz cohsaenz dix, daj paenqdix hax: "Gaenqsu mwz ndaw chaenh, miz goanz zaiz ux tw doangj naemx ux daeq maz doq su mboqyaq, gaenqsu zoq nowngz dix. ¹⁴ Dix ndonj mwz rownz gawz, su zoq daj zaeujrownz naeh hax: Lauxswz piu cham mawz: "Gowh puj qiag jinkaeuj naeh yuq rawz? Gux daj cohsaenz gux yuq inxnaeh jin byaeuz Jeng." ¹⁵ Dix zowz su mwz hauh baih now gowh dwx ux za'hoq haeuz baiz ndae'ndowq, su zoq yuq gowh naeh saeh gaenqraeuz hoak byaeuz." ¹⁶ Song goanz cohsaenz og bae, ndonj mwz ndaw chaenh, paenqdix mex gaeng goj daj gaemz Yezsuz hax naeh dungzlumj, zoq yuq dih gaengnaeh hoak byaeuz Jeng.

¹⁷ Taeng zang'haemh maz, Yezsuz zowz sipngih goanz dij goanz zawxkauq dix maz. ¹⁸ Sowh gau paenqdix naengh zongz jinkaeuj naeh, Yezsuz hax: "Gux haxdoq su swhlit, boangx su daj gux zaemh jinkaeuj inxnaeh miz goanz ux rux aeu gux kai hawj daenh." ¹⁹ Paenqdix zoq dij taeuq, hoak goanz hoak goanz cham dix: "Mboq zawh gux naeujbojleh?" ²⁰ Yezsuz daj paenqdix hax: "Dix zawh sipngih goanz dij goanz zawxkauq gux goanz ux, goanz daj gux zaemh aeu binx yup bae ndaw baed naeh. ²¹ Daj ndaw *Sw Dij Sen* laiz gaenq Lug Dij Goanz dungzlumj, Lug Dij Goanz tai mboqyaq, gaj goanz aeu dix kai naeh zoah yah! Goanz kai dix naeh gangzmaz bwnz laek miz naengz ndae nyeuz!"

²² Gau paenqdix jin naeh, Yezsuz gaem binx, mbaiq dij Sen, zoq peg binx yenh hawj cohsaenz dix, hax: "Su aeu mwz jin ndeh, gaenq naeh zawh ndang gux." ²³ Yaq dix gaem zung laeuj ndiang, mbaiq dij Sen, zoq aeu yenh hawj cohsaenz dix, paenqdix gaj goanz gaj ndut. ²⁴ Yezsuz hax: "Gaenq naeh zawh lowd gux, zawh hawj aen dungzdingq mawq naeh miz luq. Gux tai lowd gux zawh cho goanz raengh taeuq lae. ²⁵ Gux haxdoq su swhlit, daeq gannaeh mwz, gux mboq ndut laeuj maegkaeu'it eh, taengdiak vaenz gux yuq Goh dij Sen naeh zux ndut." ²⁶ Paenqdix lownx biangz dij Sen gah, zoq og daeuj, mwz Bo Maeghit naeh.

Yezsuz Hax Daengzle Viangh Dix

²⁷ Yezsuz daj paenqdix hax: "Ndaw *Sw Dij Sen* hoakzaqnaeh laiz: Dij Sen hax: "Mwznaj, gux saeuh puj dawzmbej, dij mbej zoq dungzbyaeg."r

^r14:27 Gaemz kauq naeh haeuz yuq Sw Sazzazliqyaq 13:7.

Hoakzaqnaeh, gaenqsu viangh gux mboqyaq.²⁸ Gaj gux tai yaq daeuq zaeu maz, gux bae mbanj Zazliqliq daekgoanq su."²⁹ Bihdowh daj dix hax: "Daengz daengzle viangh mawz nauq gux goj mboq rux viangh mawz."³⁰ Yezsuz daj dix hax: "Gux haxdoq mawz swhlit, haemhzawjraeuz, daekgoanq gaeq kaen song saeb, mawz sam mbaed mboq yinq gux."³¹ Bihdowh gajfa hax singjringh: "Daengz hawj gux daj mawz zaemh tai zuxbaenz, gux goj mboq rux mboq yinq mawz mah." Cohsaenz ndai dix goj zaemh hoakzaqnaeh hax.

Yezsuz Yuq Ndaw Kowhcizmaxnih

Daj Dij Sen Hax Kauq

³² Paenqdix maz taeng dih ux minxzw h rongx hoak Kowhcizmaxnih. Yezsuz daj cohsaenz dix hax: "Gaenqsu yuq inxnaeh naengh, gux bae daj dij Sen hax kauq."³³ Dix zowz Bihdowh, Yaqgowh, Yezhanq zaemh bae, ndaw zaw dix yuqraix taeuq.³⁴ Dix daj paenqdix hax: "Ndaw zaw gux yuqraix daengz zaek tai saw, gaenqsu yuq inxnaeh, yauq caqsiq hem, jinh ixux."³⁵ Yezsuz daeq mwz jij yamq ux, gvih bae dihndin, gaeuz to vanz dij Sen, hax jixzawh baenz ndaej, zoq laek hawj dix miz sowh gau naeh.³⁶ Dix hax: "Dez aj! Boh aj! Mawz gaeng goj hoak baenz, vanz mawz aeu aen zung kaem naeh ni gux, laek hawj gux jin kaem baenznaeh. Gaj mawz laek tw'zaw gux hoak, mawz daz hoakrawz mawz zoq hoakrawz."³⁷ Yezsuz dauh maz, leztaen cohsaenz dix noanzlaep, zoq daj Bihdowh hax: "Cizmaenh, mawz noanzlaep ngwx? Mawz daengz jinh gau ux naengz jinh mboq ndaej maj?"³⁸ Jinh

ixux, vanz dij Sen laek hawj gaeng coak zoah su. Ndaw zaw su dauq venq hoak hoj, gaj ndang su oanq'e se."³⁹ Yezsuz daeuq bae daj dij Sen hax kauq, hax daj gaundug dungz lumj.⁴⁰ Gau dix daeuq dauh maz naeh, leztaen cohsaenz dix noanzlaep, paenqdix moih daengz minz ta mboq baenz saw, mboq ruxndeq hoakzaqrawz yaeng dix.⁴¹ Yezsuz mbaed daih sam dauh maz, daj paenqdix hax: "Gaenqsu gannaeh naengz noanzlaep, naengz cednoiq maj? Gah yah, taeng zwz yah, Lug Dij Goanz zoah aeu kai hawj puj hoak loang yah.⁴² Dwnq maz, gaenqraeuz bae yah! Goanz kai gux naeh maz yah."

Yezsuz Zoah Daenh Gaep

⁴³ Gau Yezsuz naengz hax kauq naeh, sipngih goanz cohsaenz dix goanz hoak Yaeuhdaq naeh daj boangx ux gaem remz gaem maex maz. Boangx naeh zawh sowh goanz gvanx puj mbud dij Sen naeh, daj sowh lauxswz zau *Sw Dij Sen* naeh, daj puj saeq puj Yaeuh taiq nemz maz.⁴⁴ Goanz kai Yezsuz naeh ndaej haxdoq paenqdix, dix hax: "Gux bae zup gawz,^s gawz zoq zawh dix. Gaenqsu gaep dix, caqsiq zowz dix bae."⁴⁵ Yaeuhdaq maz taeng, cenq maz doqnaj daj Yezsuz hax: "Lauxswz!" Zoq bae zup dix.⁴⁶ Paenqdix zoq gaep Yezsuz.⁴⁷ Sowh dij goanz in yuq dih naeh, miz goanz ux it remz mbaeg zoah mbawchu goanz ux laenq. Goanz mbawchu zoah daenh mbaeg naeh zawh puj koj laux puj mbud dij Sen laux saeq dwx nyeuz daengzle naeh.⁴⁸ Yezsuz daj paenqdix hax: "Gaenqsu tw remz tw maex maz gaep gux, daj gaep puj laek dungz lumj maj?"⁴⁹ Gaenqgux vaenz vaenz yuq rownz dij Sen

^s14:44 Dih paenqdix dungzbowh bihnongx dungzmex dungzup, hoakzaqnaeh dungzdongx.

zau daenh, daj su zaemh yuq, gaenqsu mboq goangz gux, gaj su hoakzaqnaeh zoq teu suq kauq ndaw *Sw Dij Sen* hax naeh." ⁵⁰ Cohsaenz dix lenh ni dix nauq. ⁵¹ Miz goanz mbauqreaux ux, ndang dix aeu kvaix paeng banq ux gox, gaenqdix nowngzlaeng Yezsuz, daenh zoq daz gaep dix, ⁵² dix zoq viangh kvaix paeng naeh, ndangndiang lenh ni.

Yezsuz Zoah Daenh Jinj

⁵³ Paenqdix zowz Yezsuz mwz dih puj mbud dij Sen goanz saeq dwx nyeuz daengzle naeh. Yaq sowh goanz gvanx puj mbud dij Sen naeh daengzle nauq, daj sowh puj saeq gvanx dij goanz Yaeuhtaiq naeh, daj sowh lauxswz zau *Sw Dij Sen* naeh, daengzle maz nauq. ⁵⁴ Bihdowh liq Yezsuz hongj ux gaj nowngz gaj bae, nowngz mwz taengdeg gumhhongh aen rownz puj mbud dij Sen goanz saeq dwx nyeuz daengzle naeh, daj puj dawzdu zaemh naengh nau faez. ⁵⁵ Sowh goanz gvanx puj mbud dij Sen naeh daj dij goanz ndaw hoiq puj Yaeuhtaiq naeh daengzle cha saek yowngh gauq Yezsuz, daz hawj dix tai, gaj gaeng goj cha mboq taen. ⁵⁶ Miz goanz lai taeuq moakndai Yezsuz, gaj paenqdix goanz lej hax daj goanz mboq dungzlumj. ⁵⁷ Miz jij goanz ux dwnq maz, moakndai dix hax: ⁵⁸ "Piu ruxnyinz dix ndaej hoakzaqnaeh hax: Gux lid aen rownz dij Sen, aen dij goanz daengj naeh, mboq gvaq sam vaenz gux daeuq daengj ndae aen mawq, aen naeh mboq zawh aeu dij goanz daengj." ⁵⁹ Daengz gaj diauq naeh, naengz goanz lej hax daj goanz mboq dungzlumj. ⁶⁰ Sowh

gaunaeh puj mbud dij Sen goanz saeq dwx nyeuz daengzle naeh dwnq maz, cham Yezsuz: "Boangx naeh gauq mawz, gaj mawz baenzaqrawz mboq yaeng mawj?" ⁶¹ Yezsuz goj mboq goak, gaemz rawz goj mboq yaeng. Puj mbud dij Sen goanz saeq dwx nyeuz daengzle naeh daeuq cham dix: "Mawz zawh mboq zawh Jizduz, zawh mboq zawh lug zaiz laux hoj biangz naeh ah?" ⁶² Yezsuz hax: "Gux zawh. Mwznaj su leztaen Lug Dij Goanz naengh yuq baih qensa laux gaeng goj rux hoak naeh, leztaen dix kviq pajfax loangz daeuj." ⁶³ Puj mbud dij Sen goanz saeq dwx nyeuz daengzle naeh jih taeuq, riag ndangnunch dix, hax: "Gaenqraeuz mboq yungq cha sowh dij goanz ndaejtaen dix hoak loang naeh eh. ⁶⁴ Gaenqsu gaj goanz gaj haeuz ruxnyinz dix hax dix zawh lug zaiz dij Sen! Gaenqdix hoakzaqnaeh hax, hoak loang dij Sen dwx baenzaqnaeh! Gaenqsu hax dix hoj mboq hoj tai maj?" Daengzle hax dix hoak loang, hoj tai. ⁶⁵ Yaq miz dij goanz pih naemxnaiz mwz doq dix, gumq naj dix, gvenz saeuh dix, daj dix hax: "Jixzawh mawz zawh goanz zawxkauq dij Sen ux zaeh, mawz hax ndeh, zawh gawz dup mawz?" ^u Pujdawzdu laeg dix bae, aeu oangjnungz saeuh dix.

Bihdowh Sam Mbaed Mboq Yinq Zaeuj

⁶⁶ Gau naeh, Bihdowh goj naengz yuq gumhhongh. Puj mbud dij Sen goanz saeq dwx nyeuz daengzle naeh, puj koj nyingz rownz dix miz goanz ux daeq maz doq Bihdowh, ⁶⁷ leztaen Bihdowh nau faez, lez bae lez dauh, hax: "Mawz

^t14:62 Gaemz kauq naeh yuq *Sw Danqyixlix* 7:13.

^u14:65 *Zawh gawz dup mawz?* Gaemz kauq naeh mboq zawh Maxkowh mai. Luhzaz yuq ndaw *Sw Luhzaz Laiz Kauqfaengz Yezsuz Naeh* 22:64 mai gaemz naeh.

goj zawh daj Yezsuz ndaw Nazsahlowh naeh zaemh boangx!" ⁶⁸ Bihdowh mboq yinq, hax: "Mawz hax mwz rawz mwz gux goj mboq ndeq laeng mawz eh!" Bihdowh zoq og bae, bae taeng gumhhongh baihnaj, gaunaeh dij gaeq zoq kaen. ⁶⁹ Goanz puj koj nyingz gaengnaeh daj sowh puj in haenz dix naeh hax: "Goanz naeh zawh daj paenqdix zaemh boangx." ⁷⁰ Bihdowh goj naengz mboq yinq. Gvaq gau ux, sowh dij goanz in yuq haenz naeh daeuq daj Bihdowh hax: "Mawz goj zawh dij goanz mbanj Zazliqliq, mawz daj paenqdix zawh zaemh boangx zaeh." ⁷¹ Bihdowh haxgoak daekgoanq, dix hax: "Gux mboq ruxnaj goanz su hax naeh, jixzawh gux haxyai su, daengz dij Sen hawj gux baenzaqrawz gojndaej!" ⁷² Gau naeh dij gaeq cenq kaen saeb daih ngih. Bihdowh ruxnyinz dij gaeq kaen yaq, dix nwh ndaej gaemz kauq Yezsuz daj dix hax naeh. Yezsuz ndaej daj dix hoakzaqnaeh hax: "Daekgoanq dij gaeq kaen song saeb, mawz sam mbaed mboq yinq gux." Dix nwh taeng inxnaeh zoq haej.

Yezsuz Zoah Daenh Puk

Mwz Dih Bihlazdoz Naeh

15 ¹ Naw laeng zaeux, sowh goanz gvanx puj mbud dij Sen naeh, sowh puj saeq gvanx puj Yaeuhtaiq naeh, sowh lauxswz zau *Sw Dij Sen* naeh, daengzle sowh dij goanz ndaw hoiq puj Yaeuhtaiq naeh dwkgangz ndae'ndowq, zoq puk Yezsuz, zowz dix mwz dih Bihlazdoz laux saeq gvanx mbanj naeh. ² Bihlazdoz cham Yezsuz: "Mawz zawh laux hongz puj Yaeuhtaiq vah?" Yezsuz yaeng dix: "Zawh gaemz mawz hax naeh." ³ Sowh goanz gvanx puj mbud dij Sen naeh gauq

Yezsuz hoak loang lai yowngh taeuq. ⁴ Bihlazdoz daeuq cham: "Paenqdix hax mawz hoak loang lai yowngh baenzaqnaeh, mawz gaemz rawz goj mboq yaeng mawj?" ⁵ Yezsuz goj naengz mboq goak, hoakzaqnaeh hawj Bihlazdoz sawz taeuq.

Bihlazdoz Aeu Yezsuz Hawj Daenh

Lamh Mwz Maexngamzchaz

⁶ Laemh zwz naeh, bi rawz gojndae, taeng jeng rongx hoak Jeng Gvaq naeh zwzrawz, goanz puj saeq gvanx mbanj naeh zoq biak daengzle zoangq goanz puj kaenglauz ux. ⁷ Yaq zwz naeh, miz paenq goanz ux yaix daenh mboq biak kauq puj saeq Loahmax, paenqdix dix puj Loahmax, luanq kaj dij goanz, paenqdix zoq zoah puk mwz ndaw lau. Paenqnaeh miz goanz ux rongx hoak Bazlazbaz. ⁸ Goanzlai maz vanz Bihlazdoz, vanz dix hoakzaq Jeng Gvaq zwzndai naeh zoangq goanz puj kaenglauz ux. ⁹ Bihlazdoz cham paenqdix: "Gaenqsu hawj gux zoangq laux hongz puj Yaeuhtaiq naeh vah?" ¹⁰ Bihlazdoz hoakzaqnaeh cham zawh dix ruxndeq sowh goanz gvanx puj mbud dij Sen naeh aeu Yezsuz maz hawj dix zawh paenqdix ta'ndaem Yezsuz. ¹¹ Gaj sowh goanz gvanx puj mbud dij Sen naeh haeuz daj goanzlai hax, hawj paenqdix vanz Bihlazdoz zoangq Bazlazbaz. ¹² Bihlazdoz daeuq cham: "Haenx, goanz su rongx dix hoak laux hongz puj Yaeuhtaiq naeh, gux aeu dix hoakzaqrawz mawj?" ¹³ Paenqdix caqsiq rongx: "Hawj dix yuq ndaw maexngamzchaz tai!" ¹⁴ Bihlazdoz hax: "Dix hoak loang gaeng mux?" Gaj daengzle gajfa caqsiq rongx: "Hawj dix yuq ndaw maexngamzchaz tai!" ¹⁵ Bihlazdoz

dexnaj daengzle, gaenqdix zoq zoangq Bazlazbaz hawj paenqdix. Bihlazdoz hawj daenh aeu zowg faed Yezsuz. Yaq nemz daenh zowz Yezsuz og bae, hawj dix yuq ndaw maexngamzchaz tai.

¹⁶ Bin zowz Yezsuz mwz gumhhongh rownz laux saeq gvanx bin naeh, rongx daengz boangx bin maz nauq. ¹⁷ Paenqdix aeu gongzsowj riz zaemq ux nungh hawj dix, goj aeu maexnam san aen duz ux tw mwz to dix, hoakzaqnaeh zang dix daj laux hongz dungzlumj. ¹⁸ Yaq haxzawz dix: "Laux hongz puj Yaeuhtaiq, zaeu fanh bi!" ¹⁹ Paenqdix aeu laenj maexoaj ux saeuh to dix, pih naemxnaiz mwz doq dix, gvih mwz doq dix, hoak sowh zaq yuq doqnaj laux hongz jing hoak naeh. ²⁰ Paenqdix aeu dix hoakfaengz gah yaq, zoq tod gongzsowj riz zaemq dix daeuj, daeuq hawj dix nungh ndangnungh gaeuq dix, daz zowz dix og bae, hawj dix yuq ndaw maexngamzchaz tai.

Yezsuz Zoah Aeu Dengdinz

Doag Mwz Maexngamzchaz

²¹ Doanhloh, paenqdix mex goanz ux daeq ka'mowngz maz, gvaq zoah dihnaeh, paenqdix zoq gaemh goanz naeh baz maexngamzchaz aeu lamh Yezsuz naeh mwz.^v Goanz naeh zawh Cizmaenh ndaw Guxliqnaiq; dix zawh dez Yaqlihsanzdaq daj dez Nuxfuh. ²² Paenqdix gaemh Yezsuz mwz dih hoak Goahgohtaz naeh, "Goahgohtaz" zoq zawh

hax: "dih nduk to." ²³ Paenqdix aeu moahyoah daj laeuj dungzdoiq hawj dix ndut,^w gaj dix mboq venq ndut. ²⁴ Paenqdix zoq aeu dix lamh mwz maexngamzchaz, aeu dengdinz dog qen dix daj ka dix. Yaq ipqen baen ndangnungh dix, lez gawz ip ndaej.

²⁵ Gau paenqdix aeu Yezsuz lamh mwz maexngamzchaz naeh, zawh zangnaw jeux denx.

²⁶ Kvaix hax Yezsuz zawh hoak loang gaeng naeh, ndaw dix laiz: "Laux hongz puj Yaeuhtaiq."

²⁷ Miz song goanz puj laek daj Yezsuz zaemh zoah aeu dengdinz dog mwz maexngamzchaz, goanz ux yuq baih qensa Yezsuz, goanz ux yuq baih qensaix Yezsuz, dangq goanz dangq yuq now zaq maexngamzchaz ux. ^{28 x29} Sowh puj gvaq loh naeh kosaemj Yezsuz, menq vae to menq hax: "Howh! Mawz hax mawz lid aen rownz dij Sen, sam vaenz daeuq daengj dix ndae baenz, ³⁰ mawz riangz baenzaqnaeh, gannaeh mawz ciq haeggaj jeuq hoakri daeq ndaw maexngamzchaz daeuj!"

³¹ Sowh goanz gvanx puj mbud dij Sen naeh daj sowh lauxswz zau *Sw Dij Sen* naeh goj goanz lej ueq bae doq goanz ko, kosaemj dix, hax: "Dix jeuq ndaej daenh, jeuq mboq ndaej hoakri. ³² Jizduz, laux hongz Yixsowhle, jixzawh gannaeh gaenqdix daeq maexngamzchaz loangz daeuj hawj raeuz lez, loangz daeuj raeuz zoq sinq dix." Sowh puj daj dix

^v15:21 Zwz naeh, bin Loahmax aeu dengdinz dog sowh puj hoak loang dwx naeh mwz ndaw *maexngamzchaz*, hawj puj hoak loang tai. Sowh gau zowz mwz dih kaj naeh, puj hoak loang dangq goanz dangq haeggaj baz maexngamzchaz hoakri mwz.

^w15:23 Dij goanz baenz gaeng chaej ndut sowh laeujya naeh dij goanz cauz chaej ixuz.

^x15:28 Mbangj bwnz daj Sw Luhaz Laiz Kauqfaengz Yezsuz Naeh 22:37 dungzlumj miz gaemz naeh: *Dih naeh zoq daj ndaw Sw Dij Sen hax dungzlumj: Daenh aeu dix hoak daj sowh puj lvanq hoak lvanq bae naeh dungzlumj*. Gaemz kauq naeh haeuz yuq Sw Yixsaiqyaq 53:12.

dungzlumj zoah lamh maexngamzchaz naeh goj kosaemj dix.

Gau Yezsuz Kaedzaw Naeh

³³ Daeq zangnaw sw'h'owq denx mwz taeng zang'vaenz sanz denx, gaj dih gaj ndaem nauq.

³⁴ Gau zang'vaenz sanz denx naeh, Yezsuz aeu sowh kauq dix goak naeh caqsiq rongx: "*Yixloahyiz, Yixloahyiz, lazmax saxbazgoahdaqnih?*" Gaemz kauq naeh zoq zawh hax: "Dij Sen gux, dij Sen gux, mawz baenzzaqrawz viangh gux ah?" ³⁵ Sowh dij goanz in yuq haenz naeh, mbangj goanz ruxnyinz zoq hax: "Su lez, dix rongx Yixliqyaq!"^y ³⁶ Miz goanz ux lenh bae aeu haixmenh yup laeujpaed, yaq aeu qiat maexoaj yenh hawj dix ndut, hax: "Taj gau ux goanq, lez Yixliqyaq rux mboq rux daeuj jeuq dix." ³⁷ Yezsuz daeh rongx gaemz ux, zoq kaedzaw. ³⁸ Sowh gaunaeh, yuq ndaw rownz dij Sen kvaix paeng yaz ruk dij Sen naeh daeq baih now riag daeuj baihdawj, riag baenz song lit.^z ³⁹ Miz goanz leanhzangx ux in yuq doqnaj Yezsuz,^a leztaen Yezsuz hoakzaqnaeh kaedzaw, zoq hax: "Goanz naeh zawh lug zaiz dij Sen zaeh!" ⁴⁰ Goj miz puj nyingz yuq gvae lez, miz yah ux zawh Maxliqyaq dij goanz ndaw Moahdaqlaz naeh, miz goanz ux zawh Maxliqyaq meh doiq bihnongx Yaqgowh ix daj

Yezciz naeh, miz yah ux zawh Saxloahmix. ⁴¹ Ndauj Yezsuz yuq ndaw mbanj Zazliqliq naeh, le yah naeh gaj zwz gaj nowngz dix, kvej hawj dix. Sowh puj nyingz yuq gvae lez naeh, naengz miz lai yah taeuq zawh daj Yezsuz zaemh maz Yezluqsaxlaengx.

Aeu Yezsuz Moak Ndaw Ngomz

⁴² Laemh vaenz naeh zawh vaenz doxnyaengx taj Vaenz Cednoiq, vaenzlaeng mbeh'ej zawh Vaenz Cednoiq eh. Vaenznaeh fax dox ndaem maz,^b ⁴³ Yezsowh goanz ndaw Yaqliqmaxtaiq naeh, dix kaem'zaw mwz dih Bihlazdoz naeh, vanz Bihlazdoz aeu Yezsuz hawj dix peuj. Laemh goanz Yezsowh naeh, dix yuq ndaw hoiq puj Yaeuhtaiq zawh goanz ux, dix gaj zwz gaj ngwz goh dij Sen daeuj. ⁴⁴ Bihlazdoz ruxnyinz Yezsuz haeuz tai yaq, dix sawz taeuq, zoq rongx leanhzangx maz, cham dix Yezsuz tai ndowj baeq. ⁴⁵ Lenhzangx haxdoq Bihlazdoz Yezsuz tai gaurawz. Bihlazdoz ruxndeq Yezsuz tai yaq, dix zoq hawj Yezsowh aeu Yezsuz bae. ⁴⁶ Yezsowh swx maz kvaix paeng banq si liak ux, aeu Yezsuz daeuj, aeu kvaix paeng naeh toq dix. Yezsowh miz aen ngomz mohbujreuh ux, aen ngomz naeh zawh dij goanz mbud. Dix zoq aeu Yezsuz mwz nyaengx ndaw aen ngomz naeh, daeuj gauq kvaix

^y15:35 *Yixliqyaq* zawh zwzpujjeq goanz puj zawxkauq dij Sen ux. Lez Sw Laux hongz Bwn Daih Aet Naeh, Sw Laux hongz Bwnz Daih Ngih Naeh.

^z15:38 Yuq Yezluqsaxlaengx, yuq *Rownz dij Sen* miz kvaix paeng riz ux yuq Ruk dij Sen. Kvaix paeng naeh aeu dingz mboq hawj dij goanz ndonj mwz ndaw dix. Ndaw dix mizgaj puj mbud dij Sen goanz saeq dwx nyeuz daengzle naeh bi ux hawj mwz mbaed ux daep daengzle mbud dij Sen.

^a15:39 Goanz "leanhzangx" ux gvanx baeg goanz bin Loahmax.

^b15:42 Puj Yaeuhtaiq tang'vaenz doak zoq zawh vaenz laeng. Fahlih puj Yaeuhtaiq *Vaenz Cednoiq* mboq hawj moak puj tai.

tin ux maz dingz baeg ngomz.^{c 47} Maxliqyaq yah dih longq Moahdaqlaz naeh daj Maxliqyaq meh Yezciz naeh gaj goanz gaj taen dih aeu Yezsuz nyaengx naeh.

Yezsuz Daeuq Zaeu

16¹Gvaq Vaenz Cednoiq naeh yaq, Maxliqyaq yah ndaw Moahdaqlaz naeh, Maxliqyaq meh Yaqgowh naeh, Saxloahmix, paenqdix swx gaenqhom, aeu mwz lup Yezsuz.²Cinzqiztenz,^d sowh gau tang'vaenz og naeh, paenqdix zoq maz taeng dih aen ngomz mohbujreuh aeu Yezsuz nyaengx naeh.³Goanz lej daj goanz hax: "Gawz saeh raeuz ngex kvaix tin dingz baeg ngomz naeh baenz mux?"⁴Laemh maz kvaix tin naeh dwx taeuq. Paenqdix daeh ngangh to lez, kvaix tin naeh haeuz gauq yaq.⁵Paenqdix ndonj mwz ndaw ngomz, leztaen miz goanz mbauqreauh ux nungh gongzsowj kau riz ux, naengh yuq baih qensa naeh, paenqdix sawz taeuq, ndaw zaw zoq gaj dug gaj dik.⁶Goanz mbauqreauh gaengnaeh daj paenqdix hax: "Laek mbu! Gux ruxndeq gaenqsu zawh maz cha Yezsuz ndaw Nazsahlowh, goanz tai ndaw maexngamzchaz naeh. Dix mboq yuq inxnaeh, dix haeuz daeuq zaeu, su lez dih aeu dix nyaengx naeh.⁷Su bae haxdoq Bihdowh daj cohsaenz dix, haxdoq paenqdix Yezsuz bae mbanj Zazliqliq daekgoanq paenqdix, paenqdix yuq ndaw Zazliqliq leztaen dix mboqyaq, daj koax daekgoanq Yezsuz haxdoq paenqdix naeh dungzlumj."

⁸Paenqdix yaeuq sawz yaeuq mbu, cenq daeq ndaw ngomz lenh og daeuj, paenqdix mbu gvaq, gaeng goj mboq haxdoq daenh.

[Sowh bwnz daekgoanq laiz naeh mboq miz suq baihdawj inxnaeh: Gaemz daih 9 mwz taeng gaemz 20. Ingj mboq zawh Maxkowh hoakri dix laiz, gvaq doaklaeng Yezsuz daeuq zaeu jiq baeg bi ux yaq, puj ndai za suq kauq naeh.]

⁹[[Vaenz doaklaeng Vaenz Cednoiq naeh, zangnaw zaeux, Yezsuz daeuq zaeu, dix hawj Maxliqyaq yah dih longq Moahdaqlaz naeh taen. Yezsuz tai yaq daeuq zaeu, Maxliqyaq zawh goanz nduq ndaejtaen Yezsuz. Yezsuz ndaej saeh dix daem sowh dij pi mwz ndang dix naeh ni jiat do.

¹⁰Maxliqyaq bae haxdoq sowh dij goanz zwzwwz daj Yezsuz zaemh yuq naeh, gau Maxliqyaq bae taeng dih paenqdix naeh, paenqdix haej vauhvauh.

¹¹Paenqdix ruxnyinz Yezsuz daeuq zaeu, ruxnyinz Maxliqyaq ndaejtaen Yezsuz, gaj paenqdix mboq sinq.

¹²Gvaq suq saeh naeh yaq, miz song goanz cohsaenz Yezsuz bae ka'mowngz, gau paenqdix daeq loh naeh, Yezsuz hawj paenqdix taen, naj dix daj zwz dix naengz mboq tai naeh mboq dungzlumj.¹³Doiq dix mwz haxdoq le goanz cohsaenz ndai naeh, gaj paenqdix goj naengz mboq sinq.

¹⁴Doaklaeng, gau sip'aet goanz cohsaenz Yezsuz jinkaeuj naeh, Yezsuz hawj paenqdix taen, hwt

^c15:46 Yezsowh zawh goanz puj baenzsaq. Dij goanz puj baenzsaq puj Yaeuhtaiq aeu puj tai nyaengx ndaw ngomz. Sowh ngomz naeh zawh daenh mbut yuq ndaw din ndanq.

^d16:2 Gaenq raeuz vaenz cinzqiztenz naeh, nganq puj Yaeuhtaiq maz hax haeuz zawh cinzqiz ux vaenznduq dix naeh.

paenqdix mboq sinq, ndaw zaw haxnyaeb. Unj zawh cholaeng paenqdix mboq venq sinq sowh dij goanz ndaej taen dix daeuq zaeu naeh. ¹⁵ Dix daj paenqdix hax: "Su bae daengz dawj fax nauq, aeu kauqfaengz dij Sen laemh dwk daenh. ¹⁶ Gawz sinq daj hoak diauq zauh soiq naeh, gawz zoq ndaej jeuq mboqyaq; gawz mboq sinq, dij Sen zoq mboq yangq gaenq gaenqdix hoak loang naeh, dij Sen hawj dix haeggaj tw taeb daengznauq. ¹⁷ Sowh puj sinq naeh bae rawz, ijrawz zoq miz sowh saeh ndaw fax naeh, zoq zawh hax paenqdix aeu minxzwh gux daem dij pi, rux hax

kauq yowngh ndai, ¹⁸ aeu mungz gaem dij nguz, ndut gaenq miz duh goj mboq baenz rawz, aeu mungz baed puj chaej, puj chaej zoq ndae mboqyaq."

¹⁹ Yezsuz daj cohsaenz dix hax nauq suq kauq naeh, zoq zoah raep mwz ndaw fax, naengh yuq baih qensa dij Sen. ²⁰ Cohsaenz og bae, bae dih lej aeu kauqfaengz dij Sen laemh dwk dih, dij Sen daj paenqdix zaemh hoak. Paenqdix bae rawz, ijrawz zoq miz sowh saeh ndaw fax naeh, hoakzaqnaeh hawj daenh ruxndeq sowh kauqfaengz paenqdix laemh naeh zawh zaeh.]]